

AKTA PERTUBUHAN 1966

(Akta 335)

SUSUNAN SEKSYEN-SEKSYEN

BAHAGIAN 13.01 PERUNTUKAN-PERUNTUKAN YANG DIPAKAI BAGI PERTUBUHAN-PERTUBUHAN AMNYA

Seksyen

1. Tajuk ringkas, tarikh berkuatkuasa dan pemakaian.
2. Tafsiran.
- 2A. Pertubuhan berdaftar hendaklah menjalankan urusan mengikut Perlembagaan.
3. Perlantikan Pendaftar, Timbalan Pendaftar-pendaftar dan lain-lain pegawai.
- 3A. Kuasa-kuasa Pendaftar.
- 3B. Kuasa perwakilan.
4. Pertubuhan disifat ditubuhkan di dalam Persekutuan.
5. Kuasa Menteri mengisytiharkan pertubuhan sebagai menyalahi undang-undang.
6. Permohonan untuk pendaftaran.
- 6A. Kuasa Pendaftar membuat pertanyaan, dsb. berhubungan dengan mana-mana permohonan di bawah Akta ini.
7. Pendaftaran dan penolakan pendaftaran oleh Pendaftar.
8. Perakuan pendaftaran.
- 8A. Tanggungan pertubuhan berdaftar berkenaan dengan kontrak yang dibuat oleh cawangan.
9. Peruntukan yang dipakai bagi pertubuhan-pertubuhan berdaftar.
- 9A. Hal tidak layak yang terpakai kepada orang yang memegang jawatan, penasihat dan pekerja pertubuhan berdaftar.
10. Pemeriksaan dokumen dan nilai keterangan salinan yang diperakui oleh Pendaftar.
11. Perubahan nama, tempat urusan dan aturan-aturan pertubuhan.
- 11A. *(Dipotong oleh Akta A557).*
12. Cawangan pertubuhan.
13. Pembatalan dan penggantungan.
- 13A. Kuasa Pendaftar membuat perintah tertentu berkenaan dengan pertubuhan berdaftar.
14. Maklumat yang kena diberi oleh pertubuhan-pertubuhan, perintah Pendaftar supaya maklumat diberi, Pendaftar meluluskan audit dan perintah sementara untuk pembubaran.

Seksyen

15. Orang-orang yang bertanggungjawab bagi memberi maklumat.
16. Pertikaian.
17. Akibat perintah Menteri di bawah seksyen 5, penolakan pendaftaran pertubuhan tempatan oleh Pendaftar di bawah seksyen 7 dan pembatalan pendaftaran sesuatu pertubuhan berdaftar di bawah seksyen 13.
- 17A. Pemakaian seksyen 17 bagi cawangan yang menyalahi undang-undang.
- 17B. Perletakhakan pada pertubuhan berdaftar baru akan harta suatu pertubuhan yang pendaftarannya telah dibatalkan.
18. Rayuan.

BAHAGIAN IA PERUNTUKAN-PERUNTUKAN YANG TERPAKAI BAGI PARTI-PARTI POLITIK SAHAJA

- 18A. Pemakaian Bahagian I dan III.
- 18B. Hal keadaan yang tidak menjadikan sesuatu pemilihan tak sah.
- 18C. Keputusan parti politik adalah muktamad dan konklusif.

BAHAGIAN 2 PERUNTUKAN-PERUNTUKAN YANG DIPAKAI BAGI PERTUBUHAN-PERTUBUHAN FAEDAH BERSAMA SAHAJA

19. Pemakaian Bahagian 1 dan 3.
20. Kecualian.
21. Sekatan atas pendaftaran pertubuhan-pertubuhan faedah bersama.
22. Keanggotaan bagi orang-orang yang belum cukup umur.
23. Sekatan ke atas penama-penama.
24. Kedahuluan apabila pemegang-jawatan mati, menjadi muflis, dsb.
25. Perlantikan pemegang-pemegang amanah.
26. Audit.
27. Permintaan maklumat dan pemeriksaan buku-buku dan suratan-suratan oleh Pendaftar.
28. Hak memberi salinan aturan-aturan.
29. Hak memberi salinan penyata tahunan.
30. Pemeriksaan buku-buku oleh anggota.
31. Yuran dan faedah.
32. Hak, dll. pertubuhan berdaftar tidak tersentuh oleh perubahan nama.
33. (*Dipotong*).
34. (*Dipotong*).
35. Inspektor-inspektor dan mesyuarat-mesyuarat khas.
36. Pembubaran pertubuhan berdaftar.

Seksyen

37. Suratcara pembubaran.
38. Pembubaran oleh Pendaftar.
39. Notis mengenai langkah-pembicaraan bagi membatalkan pembubaran.
40. Keputusan mengenai pertikaian.

BAHAGIAN 3

PELBAGAI PERUNTUKAN YANG DIPAKAI BAGI PERTUBUHAN-PERTUBUHAN AMNYA

41. Pertubuhan-pertubuhan yang menyalahi undang-undang.
42. Seksaan-seksaan bagi pemegang-jawatan, dsb. pertubuhan yang menyalahi undang-undang.
43. Seksaan-seksaan bagi anggota pertubuhan yang menyalahi undang-undang.
44. Orang-orang yang membenarkan pertubuhan yang menyalahi undang-undang dalam bangunan.
45. Seksaan kerana menghasut, dsb. seseorang supaya menjadi seorang anggota pertubuhan yang menyalahi undang-undang.
46. Seksaan kerana mendapatkan yuran atau bantuan untuk pertubuhan yang menyalahi undang-undang.
47. Menyiarkan, dsb. dakwah pertubuhan yang menyalahi undang-undang.
48. Bertindak bagi pihak atau mewakili suatu pertubuhan yang menyalahi undang-undang.
49. Liabiliti orang yang memegang jawatan dalam sesuatu pertubuhan yang pendaftarannya telah dibatalkan.
50. Bendera, lambang, lencana atau lain-lain tanda bagi pertubuhan-pertubuhan.
51. Tanggungan pemegang jawatan berkenaan dengan kesalahan-kesalahan oleh pertubuhan.
52. Pertubuhan yang menggunakan upacara *Triad* disifatkan sebagai pertubuhan yang menyalahi undang-undang.
53. Seksaan kerana menggunakan secara salah wang atau harta pertubuhan berdaftar.
- 53A. Penalti kerana menunjukkan atau menggunakan perakuan pendaftaran yang dibatalkan.
54. Seksaan bagi tipuan, akuan palsu dan salah-guna.
- 54A. Penalti kerana memberikan maklumat palsu.
55. Anggapan.
56. Dianggap menjadi anggota, dsb., pertubuhan.
57. Keterangan.
58. Perlindungan bagi pemberi rahsia.

Seksyen

59. Perampasan.
60. Kesalahan-kesalahan yang tidak boleh dijamin dan yang kena didaftarkan.
61. Persetujuan untuk mendakwa.
62. Menyampaikan saman.
63. Kuasa masuk dan memerikan rekod.
64. Kuasa untuk masuk, menggeledah dan menyita oleh Pendaftar atau Penolong Pendaftar dalam hal-hal khas.
65. Kuasa memasuki dan menggeledah.
66. Kuasa Pendaftar atau Penolong Pendaftar bagi menyaman supaya hadir.
67. Peraturan-peraturan.
68. Pemansuhan.
69. Peruntukan peralihan yang dipakai bagi pertubuhan faedah bersama.
70. Kuasa bagi mengecualikan.

Jadual 1.

Perlembagaan dan Aturan-aturan Pertubuhan-pertubuhan.

Jadual 2.

Perlembagaan dan Aturan-aturan Pertubuhan-pertubuhan Faedah Bersama.

AKTA PERTUBUHAN 1966

(AKTA 335)

Suatu Akta bagi meminda dan menyatukan undang-undang berhubung dengan pendaftaran pertubuhan-pertubuhan.

[1.2.1966]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen dan dengan kuasa daripadanya seperti berikut:

BAHAGIAN I

PERUNTUKAN-PERUNTUKAN UNTUK DIPAKAI BAGI PERTUBUHAN-PERTUBUHAN AMNYA

1. Tajuk ringkas, tarikh berkuatkuasa dan pemakaian:

(1) Akta ini bolehlah dinamakan Akta Pertubuhan, 1966 dan tertakluk kepada seksyen-kecil (2) dalam seksyen ini hendaklah berjalan kuatkuasanya pada tarikh yang ditetapkan oleh Menteri melalui pemberitahu dalam *Warta Kerajaan*, dan tarikh itu tidaklah boleh lebih awal daripada tarikh pemberitahu itu disiarkan.

(2) Menteri boleh, melalui pemberitahu dalam *Warta Kerajaan*, menggantung kuatkuasa segala atau mana-mana daripada peruntukan-peruntukan Akta ini di mana-mana tempat dalam Persekutuan untuk sesuatu tempoh sebagaimana yang dinyatakan dalam pemberitahu itu.

(3) Akta ini hendaklah berkuatkuasa di seluruh Persekutuan.

2. Tafsiran.

Dalam Akta ini, melainkan kandungan ayatnya menghendaki makna yang lain—

“Penolong Pendaftar” ertinya mana-mana pegawai yang dilantik sebagai seorang Penolong Pendaftar Pertubuhan di bawah seksyen 3;

“faedah” ertinya pembayaran yang dibuat oleh sesuatu pertubuhan faedah bersama untuk bantuan atau nafkah bagi anggota-anggota atau peyuran-peyurannya atau apabila ada kelahiran atau kematian mengikut aturan-aturan pertubuhan faedah bersama itu;

“Pertubuhan tempatan” ertinya mana-mana pertubuhan yang disusun dan ditubuhkan di dalam Persekutuan atau yang ada mempunyai ibu-pejabat atau tempat utama urusannya di dalam Persekutuan, dan termasuklah mana-mana pertubuhan yang disifat ditubuhkan di dalam Persekutuan menurut kuasa seksyen 4 dalam Akta ini;

“Menteri” ertinya Menteri yang pada masa itu bertanggungjawab atas pendaftaran pertubuhan-pertubuhan;

“pertubuhan faedah bersama” ertinya mana-mana pertubuhan yang, menurut tujuan-tujuan dan aturan-aturannya sama ada sebagai tujuan utama atau sebagai tujuan tambahan, ada membuat peruntukan dengan jalan yuran-yuran sukarela daripada anggota-anggotanya atau peyuran-peyurannya sama ada berserta dengan bantuan derma atau tidak untuk—

- (a) bantuan atau nafkah bagi anggota-anggota atau peyuran-peyurannya, suami, isteri, anak, bapa, ibu, saudara, anak saudara atau anak peliharaan mereka dalam masa sakit atau lain-lain keuzuran, sama ada badan atau otak, pada masa tua atau pada masa menjadi balu atau untuk bantuan atau nafkah bagi anak-anak yatim anggota-anggota atau anak-anak yatim peyuran-peyuran dalam masa belum cukup umur; atau
- (b) membayar wang apabila lahir anak seseorang anggota atau peyuran atau apabila mati seseorang anggota atau peyuran atau apabila mati anak, suami, isteri, ibu-bapa, atau nenek seseorang anggota atau peyuran atau apabila mati mana-mana orang lain atau untuk belanja kebumian anggota atau peyuran atau anak, suami atau isteri kepada anggota atau peyuran atau balu seseorang anggota atau peyuran yang telah mati; atau
- (c) bantuan atau nafkah bagi anggota-anggota atau peyuran-peyuran apabila menganggur atau apabila di dalam keadaan menderita;

“pemegang-jawatan” bagi sesuatu pertubuhan ertinya mana-mana orang yang menjadi yang di-pertua atau naib yang di-pertua, atau setiausaha atau bendahari bagi pertubuhan atau bagi mana-mana cawangan sesuatu pertubuhan, atau mana-mana orang yang menjadi seorang ahli jawatankuasa atau ahli badan pengelolanya, atau seorang ahli jawatankuasa atau badan pengelola bagi mana-mana cawangannya atau mana-mana orang yang memegang apa-apa

jawatan atau kedudukan yang sama dengan mana-mana yang tersebut di atas di dalam pertubuhan itu atau di dalam cawangan sesuatu pertubuhan;

“Pendaftar” ertinya Pendaftar Pertubuhan yang dilantik di bawah seksyen 3 dalam Akta ini dan termasuklah mana-mana Timbalan Pendaftar Pertubuhan yang dilantik di bawah seksyen itu juga;

“pertubuhan berdaftar” ertinya mana-mana pertubuhan yang pada masa itu didaftarkan di bawah seksyen 7;

“parti politik” ertinya—

- (a) sesuatu pertubuhan yang menurut mana-mana tujuan atau kaedahnya, tidak kira sama ada tujuan atau kaedah itu adalah tujuan atau kaedah utamanya, atau semata-mata merupakan tujuan atau kaedah yang menjadi tambahan kepada tujuan atau tujuan-tujuan utamanya atau kepada kaedah atau kaedah-kaedah utamanya, mengadakan peruntukan bagi pertubuhan itu menyertai, melalui calon-calonnya, dalam pemilihan ke Dewan Rakyat, atau ke Dewan Undangan Negeri, atau ke pihak berkuasa tempatan, atau mengadakan peruntukan baginya mengusahakan perlantikan atau pemilihan ke Dewan Negara seseorang yang dicadangkan atau disokong olehnya, atau
- (b) sesuatu pertubuhan yang, walau apa pun yang terkandung dalam tujuan-tujuan atau kaedah-kaedahnya, menjalankan apa-apa aktiviti-aktiviti atau mengejar apa-apa matlamat yang melibatkan penyertaannya, melalui calon-calonnya, dalam pemilihan ke Dewan Rakyat, atau ke Dewan Undangan Negeri, atau ke pihak berkuasa tempatan, atau yang melibatkan ia mengusahakan perlantikan atau pemilihan ke Dewan Negara seseorang yang dicadangkan atau disokong olehnya;

“pertubuhan” termasuklah mana-mana kelab, syarikat, perkongsian, atau persatuan tidak kira apa jua jenis atau tujuannya, sama ada sementara atau kekal, yang mengandungi tujuh orang atau lebih tetapi tidak termasuk—

- (a) mana-mana syarikat yang didaftarkan di bawah peruntukan mana-mana undang-undang bertulis berhubung dengan syarikat-syarikat yang pada masa itu berjalan kuatkuasanya di dalam Persekutuan;

- (b) mana-mana syarikat atau persatuan yang ditubuhkan di bawah mana-mana undang-undang bertulis;
- (c) mana-mana kesatuan sekerja yang didaftarkan atau dikehendaki didaftarkan di bawah peruntukan mana-mana undang-undang bertulis berhubung dengan kesatuan sekerja yang pada masa itu berjalan kuatkuasanya di dalam Persekutuan;
- (d) mana-mana syarikat, persatuan atau perkongsian dan yang ditubuhkan bagi maksud semata-mata untuk menjalankan apa-apa urusan yang sah di sisi undang-undang yang bertujuan supaya keuntungan diperolehi oleh syarikat, persatuan atau perkongsian itu, atau oleh anggota-anggota perseorangannya;
- (e) mana-mana syarikat kerjasama, yang didaftar sedemikian itu, di bawah mana-mana undang-undang bertulis;
- (f) mana-mana pertubuhan atau persatuan yang berkenaan dengannya ada pada masa itu berjalan kuatkuasa suatu perakuan (yang boleh diberi, tidak diberi, atau dibatalkan menurut budibicaranya) oleh seseorang atau sesuatu pihak berkuasa yang dilantik di bawah peruntukan undang-undang bertulis yang pada masa itu berjalan kuatkuasanya berhubung dengan pendaftaran sekolah-sekolah jika pertubuhan atau persatuan itu menjadi sebahagian daripada bidang pelajaran bagi sesebuah sekolah; atau
- (g) mana-mana sekolah, jawatankuasa pengurus sesebuah sekolah, persatuan ibu-bapa atau persatuan ibu-bapa dan guru yang didaftarkan atau dikecualikan daripada pendaftaran di bawah mana-mana undang-undang yang pada masa itu berjalan kuatkuasanya berkenaan dengan mengawal sekolah-sekolah;

“yuran” ertinya yuran yang dibayar oleh seseorang anggota atau peyuran kepada sesuatu pertubuhan faedah bersama dan jika sesuatu pertubuhan faedah bersama menjalankan gerakan-gerakan, lain daripada gerakan-gerakan bagi pertubuhan faedah bersama, maka perkataan itu ertinya yuran yang dibayar oleh anggota atau peyurannya bagi maksud mendapat faedah-faedah yang diperuntukkan oleh aturan-aturan pertubuhan itu.

2A. Pertubuhan berdaftar hendaklah menjalankan urusan mengikut Perlembagaan.

Adalah menjadi kewajipan tiap-tiap pertubuhan berdaftar dalam

menjalankan aktiviti-aktivitinya dan dalam menjalankan hal-ehwalnya, memastikan bahawa aktiviti-aktiviti dan hal-ehwal itu adalah mengikut, selaras mengikut dan mematuhi, peruntukan-peruntukan Perlembagaan Persekutuan dan Perlembagaan-Perlembagaan Negeri, dan jika ada apa-apa daripada aktiviti-aktiviti atau hal-ehwal mana-mana pertubuhan yang adalah dalam apa cara berlawanan dengan, atau berkurangan atau bertentangan terhadap, atau tidak mengambilkira mengenai—

- (a) sistem kerajaan demokratik yang diperintah oleh seorang Raja berperlembagaan Malaysia, dan, dalam Negeri-negeri masing-masing, oleh Raja-raja berperlembagaannya atau Yang di-Pertua Negeri, atau
- (b) kedudukan agama Islam sebagai agama Malaysia, dengan agama-agama lain diamalkan secara aman dan harmoni; atau
- (c) penggunaan Bahasa Kebangsaan bagi maksud-maksud rasmi; atau
- (d) kedudukan orang Melayu dan orang asli Negeri Sabah dan Sarawak; atau
- (e) kepentingan sahtaraf kaum-kaum yang lain,

seperti yang diperuntukkan di bawah Perlembagaan Persekutuan atau mana-mana Perlembagaan Negeri, Pendaftar boleh membatalkan pendaftaran pertubuhan itu selepas memberi pertubuhan itu suatu peluang untuk memberi representasi kepadanya.

(2) *(Dibatalkan oleh Akta A557).*

3. **Perlantikan Pendaftar, Timbalan Pendaftar-pendaftar dan lain-lain pegawai.**

(1) Yang di-Pertuan Agong boleh melantik seorang Pendaftar [Pind. Akta A1027] Pertubuhan dan beberapa orang Timbalan Pendaftar, yang difikirkannya perlu bagi maksud Akta ini.

(1A) Menteri boleh melantik apa-apa bilangan Penolong Pendaftar [Mas. Akta A1027] dan pegawai lain yang difikirkannya perlu bagi pentadbiran yang sepatutnya Akta ini.

(1B) Timbalan Pendaftar, Penolong Pendaftar dan pegawai-pegawai lain yang dilantik masing-masingnya di bawah seksyen-kecil (1) dan (1A) hendaklah berada di bawah arahan dan kawalan Pendaftar. [Mas. Akta A1027]

(2) Semua pegawai yang dilantik di bawah seksyen-kecil (1) dan (1A) dalam seksyen ini hendaklah disifatkan sebagai penjawat awam bagi maksud Kanun Keseksaan.

(3) Tiadalah apa-apa jua guaman boleh dibawa terhadap mana-mana penjawat awam kerana apa-apa jua yang dilakukan atau yang ditinggal daripada dilakukan olehnya dengan suci hati serta dengan tiada kecuaiian dan bagi maksud menjalankan apa-apa kuasa atau bagi maksud menyempurnakan apa-apa kewajipan yang diberi atau ditanggunjkan kepadanya oleh Akta ini.

3A. Kuasa-kuasa Pendaftar.

Sebagai tambahan kepada kuasa-kuasa, tugas-tugas dan fungsi-fungsi yang diberi kepada Pendaftar oleh Akta ini dan mana-mana peraturan-peraturan yang dibuat di bawahnya, Pendaftar hendaklah mempunyai dan boleh menjalankan segala kuasa, menunaikan segala tugas dan melaksanakan segala fungsi sebagaimana yang perlu bagi maksud menguatkuasakan dan menjalankan peruntukan-peruntukan Akta ini.

3B. Kuasa perwakilan.

(1) Pendaftar boleh, secara bertulis, mewakilkan mana-mana kuasa yang diberikan kepadanya di bawah Akta, kecuali kuasa perwakilan di bawah seksyen ini, kepada mana-mana Penolong Pendaftar yang dilantik di bawah seksyen 3.

(2) Sesuatu perwakilan di bawah seksyen-kecil (1) boleh dijadikan tertakluk kepada apa-apa sekatan dan batasan yang ditetapkan oleh Pendaftar dalam surat cara perwakilan itu.

(3) Kuasa perwakilan di bawah seksyen-kecil (1) hendaklah dijalankan oleh Pendaftar sendiri.

4. Pertubuhan disifat ditubuhkan di dalam Persekutuan.

Sesuatu pertubuhan adalah disifat sebagai ditubuhkan di dalam Persekutuan, walaupun ianya disusun dan mempunyai ibu pejabatnya atau tempat utama urusannya di luar Persekutuan, jika sesiapa jua daripada pemegang-pemegang jawatannya atau anggota-anggotanya tinggal atau ada di dalam Persekutuan, atau jika sesiapa jua di dalam Persekutuan menguruskan atau menolong dalam pengurusan pertubuhan itu atau meminta atau memungut wang atau yuran bagi pihaknya:

Dengan syarat bahawa tiadalah apa-apa juga pertubuhan boleh disifat sebagai ditubuhkan demikian itu, jika ada selagi—

(a) ia disusun dan menjalankan gerakannya semata-mata di luar Persekutuan; dan

(b) tiada apa-apa jua pejabat, tempat urusan atau tempat mesyuarat, diselenggarakan atau digunakan di dalam Persekutuan oleh pertubuhan itu atau oleh sesiapa jua bagi pihaknya; dan

(c) tiada apa-apa daftar mengenai semua atau mana-mana daripada anggota pertubuhan itu disimpan di dalam Persekutuan; dan

(d) tiada apa-apa yuran dipungut atau diminta di dalam Persekutuan oleh pertubuhan itu atau oleh sesiapa jua bagi pihaknya.

5. Kuasa Menteri mengisytiharkan pertubuhan sebagai menyalahi undang-undang.

(1) Maka adalah sah di sisi undang-undang bagi Menteri, menurut budibicaranya yang mutlak, dengan jalan perintah, mengisytiharkan sebagai menyalahi undang-undang mana-mana pertubuhan, cawangan atau peringkat atau jenis pertubuhan yang pada pendapatnya, adalah atau sedang digunakan bagi maksud yang memudaratkan atau yang bertentangan dengan kepentingan keselamatan Persekutuan atau mana-mana tempat di dalamnya, ketenteraman awam atau akhlak.

(2) Sesuatu perintah yang dibuat di bawah seksyen ini hendaklah disiarkan dalam *Warta Kerajaan* dan adalah berkuatkuasa sebagai membatalkan dengan serta-merta pendaftaran mana-mana pertubuhan atau pertubuhan-pertubuhan itu, jika telah didaftarkan di bawah Akta ini; dan tiadalah apa-apa jua pertubuhan yang sesuatu perintah telah dibuat ke atasnya di bawah seksyen ini boleh didaftarkan di bawah Akta ini.

(3) Peruntukan-peruntukan seksyen 17 hendaklah dipakai berkenaan dengan sesuatu pertubuhan tempatan yang terkena kepada perintah yang dibuat di bawah seksyen ini.

6. Permohonan untuk pendaftaran.

(1) Tiap-tiap pertubuhan tempatan, lain daripada pertubuhan tempatan yang berkenaan dengannya sesuatu perintah yang dibuat di bawah seksyen 5 ada berjalan kuatkuasa, hendaklah, mengikut

cara yang ditetapkan, membuat permohonan kepada Pendaftar untuk pendaftaran di bawah Akta ini.

(2) Sehingga sesuatu pertubuhan tempatan didaftarkan di bawah Akta ini, tiadalah sesiapa jua boleh, dengan tiada kebenaran bertulis daripada Pendaftar, menyusun atau mengambil bahagian di dalam apa-apa gerakan atau bagi pihak pertubuhan itu, kecuali hanya untuk memohon kepada atau untuk bersurat menyurat dengan Pendaftar.

[Pind. Akta
A1027]

(3) Sesiapa yang melakukan pelanggaran terhadap seksyen-kecil (2) adalah melakukan suatu kesalahan dan, apabila disabitkan, bolehlah dikenakan denda tidak lebih daripada lima ribu ringgit, dan jika pelanggaran itu adalah suatu pelanggaran yang berlanjutan, maka orang itu bolehlah dikenakan denda tidak lebih daripada lima ratus ringgit bagi tiap-tiap hari pelanggaran itu dilanjutkan selepas hari yang pertama.

6A. Kuasa Pendaftar membuat pertanyaan, dsb. berhubungan dengan mana-mana permohonan di bawah Akta ini.

(1) Pendaftar boleh, berhubungan dengan mana-mana permohonan di bawah seksyen 6, subseksyen (1) seksyen 11, subseksyen (1) seksyen 12, seksyen 49, subseksyen (1) seksyen 50, atau mana-mana peruntukan lain dalam Akta ini atau peraturan-peraturan yang dibuat di bawahnya, meminta apa-apa maklumat lanjut, dan membuat apa-apa pertanyaan, sebagaimana yang difikirkannya perlu.

(2) Jika seseorang yang membuat apa-apa permohonan sepertimana yang disebutkan dalam subseksyen (1) tidak memberi maklumat lanjut yang diminta itu, atau menjawab pertanyaan-pertanyaan yang dibuat itu, hingga memuaskan hati Pendaftar, maka dia boleh menolak permohonan itu.

7. Pendaftaran dan penolakan pendaftaran oleh Pendaftar.

(1) Apabila permohonan di bawah seksyen 6 diterima, Pendaftar hendaklah, tertakluk kepada peruntukan seksyen ini dan apa-apa syarat yang disifatkan oleh Pendaftar patut dikenakan, mendaftarkan pertubuhan tempatan yang membuat permohonan itu.

(2) Pendaftar boleh menolak pendaftaran sesuatu pertubuhan tempatan jika—

(a) ia puashati bahawa sesuatu pertubuhan adalah menjadi cawangan mana-mana pertubuhan yang pendaftarannya

[Gan. Akta
A1027]

telah dibatalkan di bawah perenggan, (c) seksyen-kecil (1) dalam seksyen 13; atau

(b) ia tidak puashati bahawa pertubuhan tempatan itu telah menurut peruntukan Akta ini dan peruntukan peraturan-peraturan yang dibuat di bawahnya; atau

(c) sesuatu pertikaian berlaku di antara anggota-anggota pertubuhan tempatan itu tentang orang-orang yang akan menjadi pemegang-pemegang jawatan atau yang akan memegang atau mentadbirkan apa-apa harta pertubuhan itu sehingga pertikaian itu diputuskan oleh Mahkamah atau dengan jalan timbangtara atau dengan jalan perjanjian di antara anggota-anggotanya atau dengan lain-lain jalan.

(3) Pendaftar hendaklah menolak pendaftaran sesuatu pertubuhan tempatan jika—

(a) pada pendapatnya bahawa pertubuhan tempatan itu adalah menyalahi undang-undang menurut peruntukan Akta ini atau mana-mana lain undang-undang bertulis atau bahawa ianya mungkin digunakan bagi maksud-maksud yang menyalahi undang-undang atau bagi apa-apa maksud yang memudaratkan atau yang bertentangan dengan keamanan, kebajikan, keselamatan, ketenteraman awam, ketenteraman atau akhlak di dalam Persekutuan;

(b) pertubuhan itu telah diisytiharkan oleh Menteri sebagai menyalahi undang-undang menurut seksyen 5;

(c) Pendaftar puashati bahawa pertubuhan itu tidak ada; atau

(d) nama yang dengannya pertubuhan itu akan didaftarkan—

(i) pada pendapat Pendaftar akan mengelirukan atau dikira akan mengelirukan orang-orang awam tentang corak atau maksud pertubuhan itu yang sebenarnya atau adalah sebegitu hampir serupa dengan nama lain-lain pertubuhan hingga mungkin memperdayakan orang-orang awam atau anggota-anggota mana-mana satu pertubuhan itu; atau

(ii) adalah sama dengan nama mana-mana lain pertubuhan tempatan yang ada; atau

(iii) adalah, pada pendapat Pendaftar, tidak diingini;

(e) perlembagaan atau aturan-aturan pertubuhan itu tidak mengandungi peruntukan-peruntukan bagi segala hal yang diterangkan di dalam Jadual 1 dalam Akta ini atau, jika

pertubuhan itu ialah suatu pertubuhan faedah bersama, bagi segala hal yang diterangkan dalam Jadual 2 atau bagi lain-lain hal yang munasabah boleh diminta oleh Pendaftar.

(4) Jika Pendaftar telah menolak pendaftaran sesuatu pertubuhan tempatan di bawah seksyen ini, maka peruntukan seksyen 17 hendaklah dipakai bagi pertubuhan tempatan itu.

[Mas. Akta
A1027]

(5) Mana-mana pertubuhan yang melanggar mana-mana syarat yang dikenakan ke atasnya oleh Pendaftar di bawah seksyen-kecil (1) adalah melakukan suatu kesalahan dan, apabila disabitkan, boleh dikenakan denda tidak lebih daripada dua ribu ringgit.

8. Perakuan pendaftaran.

Pendaftar, apabila mendaftarkan sesuatu pertubuhan tempatan di bawah seksyen 7, hendaklah mengeluarkan kepada pertubuhan itu suatu perakuan pendaftaran mengikut borang yang ditetapkan, dan perakuan itu hendaklah, melainkan dibukti telah dibatalkan, menjadi keterangan muktamad bagi segala maksud bahawa pertubuhan itu telah sempurna didaftarkan di bawah Akta ini.

8A. Tanggungan pertubuhan berdaftar berkenaan dengan kontrak yang dibuat oleh cawangan.

(1) Walau apa pun yang terkandung dalam seksyen 12, sesuatu pertubuhan berdaftar tidaklah boleh mendakwa atau didakwa berkenaan dengan apa-apa kontrak yang dibuat oleh mana-mana cawangannya, atau oleh mana-mana pemegang jawatan cawangan itu melainkan jika kontrak itu telah dibuat oleh cawangan menurut kuasa kebenaran nyata yang diberi kepada cawangan itu oleh jawatankuasa atau badan pengelola pertubuhan berdaftar, atau adalah suatu kontrak dalam golongan atau perihalan tertentu yang mana cawangan diberi kuasa secara am atau secara khusus oleh pertubuhan itu untuk membuat kontrak; dan peruntukan-peruntukan perenggan (c), (d) dan (e) seksyen 9 hendaklah diertikan dengan sewajarnya dalam pemakaiannya bagi apa-apa guaman, prosiding, penghukuman, atau pemakaian bagi pelaksanaan berhubungan dengan apa-apa kontrak yang dibuat oleh suatu cawangan suatu pertubuhan berdaftar.

(2) Tanpa menyentuh subseksyen (1), di mana suatu cawangan, yang disebut "cawangan bawahan" dalam subseksyen ini, adalah di bawah kawalan dan bertanggungjawab kepada suatu cawangan lain, yang disebut "cawangan atasan" dalam subseksyen ini, cawangan atasan itu boleh mendakwa atau didakwa bagi kontrak-kontrak yang

dibuat oleh cawangan bawahan jika kontrak itu dibuat menurut kuasa kebenaran bertulis yang nyata yang diberi oleh cawangan atasan, atau adalah suatu kontrak yang termasuk dalam golongan atau perihalan kontrak yang mana cawangan bawahan itu diberi kuasa oleh cawangan atasan untuk membuatnya:

Dengan syarat bahawa suatu cawangan hendaklah dalam apa jua hal disifatkan berada di bawah kawalan dan bertanggungjawab kepada suatu cawangan yang lain jika anggota-anggota cawangan atasan itu adalah dinamakan, dipilih atau dengan cara lain dipilih dari anggota cawangan-cawangan bawahan.

9. Peruntukan yang dipakai bagi pertubuhan-pertubuhan berdaftar.

Peruntukan-peruntukan yang berikut hendaklah dipakai bagi pertubuhan-pertubuhan berdaftar—

- (a) harta yang boleh dialih bagi sesuatu pertubuhan, jika sekiranya tidak terletak di tangan pemegang-pemegang amanah, hendaklah pada masa itu disifatkan terletak di tangan badan pengelola pertubuhan itu, dan di dalam segala pembicaraan, sivil dan jenayah, bolehlah disebut sebagai harta badan pengelola pertubuhan itu atas nama badan pengelola pertubuhan itu yang betul, jika diketahui;
- (b) harta yang tak boleh dialih, bagi sesuatu pertubuhan boleh, jika sekiranya tidak didaftarkan atas nama pemegang-pemegang amanah, walaupun ada peruntukan undang-undang bertulis yang berlawanan, didaftarkan atas nama pertubuhan itu, dan segala suratcara yang berkaitan dengan harta itu adalah sah dan berkuatkuasa seolah-olah suratcara-suratcara itu telah disempurnakan oleh seorang tuannya berdaftar dengan syarat bahawa suratcara-suratcara itu adalah disempurnakan oleh tiga orang pemegang-jawatan pertubuhan itu, yang ada pada masa itu dan perlantikan mereka adalah disahkan oleh suatu perakuan daripada Pendaftar, dan dimeterikan dengan meteri pertubuhan itu;
- (c) sesuatu pertubuhan boleh mendakwa atau didakwa atas nama mana-mana seorang daripada anggota-anggotanya sebagaimana yang dinyatakan kepada Pendaftar dan didaftarkan olehnya sebagai pegawai awam pertubuhan itu bagi maksud itu, dan, sekiranya tiada seseorang seperti itu didaftarkan, maka berhaklah bagi seseorang yang ada

mempunyai sesuatu tuntutan atau permintaan terhadap pertubuhan itu mendakwa pertubuhan itu atas nama mana-mana pemegang-jawatan pertubuhan itu;

- (d) tiadalah apa-apa jua guaman atau pembicaraan yang dibawa oleh atau terhadap sesuatu pertubuhan berdaftar dalam mana-mana mahkamah sivil boleh terhenti atau tertahan semata-mata oleh sebab orang yang membawa atau yang terhadapnya di bawah guaman atau pembicaraan itu telah mati atau tidak lagi memegang jawatan yang atas namanya ia telah mendakwa atau didakwa, akan tetapi guaman atau pembicaraan itu hendaklah diteruskan atas nama pengganti atau terhadap pengganti orang itu;
- (e) (i) tiadalah apa-apa jua hukuman dalam mana-mana guaman yang tersebut itu atau terhadap sesuatu pertubuhan berdaftar boleh dikuatkuasakan terhadap orang atau harta orang yang didakwa kecuali terhadap harta pertubuhan itu;
- (ii) permohonan untuk pelaksanaan hendaklah mengandungi hukuman itu, nama pihak yang terhadapnya hukuman itu telah didapati yang telah mendakwa atau yang telah didakwa, mengikut mana yang berkenaan, bagi pihak pertubuhan itu, dan hendaklah meminta supaya hukuman itu dikuatkuasakan terhadap harta pertubuhan itu;
- (f) mana-mana anggota yang—
 - (i) tidak membayar yuran yang ia terpaksa membayar mengikut aturan-aturan pertubuhan yang ia menjadi anggota;
 - (ii) terhutang wang kepada pertubuhan;
 - (iii) mengambil milik atau menahan apa-apa harta pertubuhan berlawanan dengan aturan-aturannya; atau
 - (iv) membencana atau membinasakan apa-apa harta pertubuhan,boleh, mengikut cara yang diperuntukkan dahulu daripada ini, didakwa kerana yuran atau wang itu atau kerana kerosakan yang timbul daripada perbuatan memiliki, menahan, membencana atau membinasakan dengan salahnya harta itu:

Dengan syarat bahawa sekiranya orang yang kena tuntutan itu berjaya dalam guaman itu dan dihukum diberi belanja, ia boleh memilih sama ada menuntut belanja itu daripada pegawai yang atas namanya guaman itu telah dibawa atau daripada pertubuhan; dan sekiranya daripada pertubuhan, ia boleh mendapat pelaksanaan terhadap harta pertubuhan;

(g) mana-mana anggota yang—

- (i) melakukan curian, atau yang menyalahgunakan dengan curang atau menjadikan untuk penggunaannya sendiri, apa-apa wang atau lain-lain harta;
- (ii) dengan bersengaja atau jahat membinasa atau membencanakan apa-apa harta pertubuhan; atau
- (iii) memalsukan apa-apa surat-ikatan, bon, cagaran untuk wang, resit atau lain-lain suratcara dan dengan demikian itu mungkin merugikan kumpulan-kumpulan wang pertubuhan,

bolelah kena didakwa dan diseksa seolah-olah ia bukan seorang anggota; dan

(h) jika tiada apa-apa peruntukan yang tertentu dalam aturan-aturan sesuatu pertubuhan, maka sebilangan yang tidak kurang daripada tiga per lima daripada bilangan anggota-anggota bagi mana-mana pertubuhan itu yang pada masa itu tinggal di dalam Persekutuan boleh memutuskan supaya pertubuhan itu dibubarkan dengan serta-merta atau pada sesuatu masa yang dipersetujui, dan segala langkah yang perlu hendaklah diambil untuk melepaskan dan menyelesaikan harta pertubuhan itu, tuntutan-tuntutan dan tanggungan-tanggungannya, mengikut aturan-aturan (jika ada) pertubuhan yang tersebut itu yang berkenaan dengannya dan jika sekiranya tidak ada, maka hendaklah mengikut sebagaimana yang diarahkan oleh badan pengelolanya:

Dengan syarat bahawa jika apa-apa pertikaian timbul di antara ahli-ahli badan pengelola yang tersebut itu atau anggota-anggota pertubuhan itu di bawah perenggan (h) dalam seksyen ini, maka pertikaian itu bolehlah, diputuskan oleh Pendaftar. Mana-mana orang yang musykil tentang apa-apa keputusan Pendaftar di bawah perenggan ini bolehlah, dalam masa tiga puluh hari dari tarikh keputusan itu, merayu kepada Mahkamah.

9A. Hal tidak layak yang terpakai kepada orang yang memegang jawatan, penasihat dan pekerja pertubuhan berdaftar.

(1) Tertakluk kepada subseksyen (2) dan (4), seseorang hendaklah hilang layak daripada menjadi, dan tidak boleh menjadi atau masih menjadi, sebagai seseorang yang memegang jawatan, penasihat atau pekerja sesuatu pertubuhan berdaftar—

- (a) jika dia telah disabitkan atas apa-apa kesalahan di bawah Akta ini; atau
- (b) jika dia telah disabitkan atas apa-apa kesalahan di bawah mana-mana undang-undang dan dihukum denda tidak kurang daripada dua ribu ringgit atau dipenjarakan selama tempoh tidak kurang daripada satu tahun; atau
- (c) jika terdapat apa-apa perintah tahanan, sekatan, kawalseliaan, kediaman terhad, buang negeri atau deportasi di bawah mana-mana undang-undang yang berhubungan dengan keamanan, kesejahteraan awam di dalam, Malaysia atau mana-mana bahagiannya, atau dengan pencegahan jenayah, tahanan pencegahan, kediaman terhad, buang negeri atau migrasi yang sedang berkuatkuasa; atau
- (d) jika dia adalah seorang bankrap yang belum dilepaskan; atau
- (e) jika dia adalah dan telah didapati atau diisytiharkan sebagai sakit otak.

(2) Ketaklayakan seseorang di bawah perenggan (b) subseksyen (1) hendaklah terhenti pada akhir tempoh lima tahun bermula dari tarikh yang mana orang yang disabitkan itu dibebaskan daripada jagaan atau tarikh yang mana denda yang disebut dikenakan, mengikut mana yang berkenaan.

(3) Jika Pendaftar menandatangani notis memberitahu sesuatu pertubuhan bahawa mana-mana orang yang memegang jawatan, penasihat atau pekerja pertubuhan itu telah menjadi taklayak di bawah subseksyen (1), pertubuhan itu hendaklah dengan sertamerta memberi kesan kepada ketaklayakan itu.

(4) Mana-mana orang yang tertakluk kepada mana-mana ketaklayakan di bawah subseksyen (1) perenggan (a), (b) atau (c) boleh memohon kepada Pendaftar untuk dikecualikan daripada pemakaian ketaklayakan itu, dan Pendaftar boleh, jika berpendapat patut berbuat demikian, memberinya pengecualian itu untuk tempoh sebagaimana yang boleh dinyatakan olehnya dan tertakluk kepada batasan-batasan,

sekatan-sekatan, terma-terma atau syarat-syarat sebagaimana yang Pendaftar boleh putus untuk mengenakanya.

(5) *(Dibatalkan oleh Akta A557).*

(6) Mana-mana orang yang melanggar mana-mana peruntukan subseksyen (1) atau mana-mana batasan, sekatan, terma atau syarat yang dikenakan di bawah subseksyen (4) adalah bersalah kerana melakukan suatu kesalahan dan hendaklah dikenakan, apabila disabitkan, penjara selama suatu tempoh tidak melebihi tiga tahun atau kepada suatu denda tidak melebihi sepuluh ribu ringgit atau kedua-duanya.

[Pind. Akta
A1027]

(7) Bagi maksud-maksud subseksyen (1), “orang yang memegang jawatan” termasuk—

- (a) seorang ahli mana-mana jawatankuasa kecil atau badan lain yang ditubuhkan atau dibentuk oleh badan yang menguasai sesuatu pertubuhan berdaftar, atau oleh badan yang menguasai sesuatu cawangan pertubuhan itu;
- (b) mana-mana orang yang bertanggungjawab setakat mana pengurusan mana-mana hal-ehwal, atau penjalanan mana-mana aktiviti, suatu pertubuhan berdaftar, atau mana-mana cawangan pertubuhan itu; dan
- (c) mana-mana orang yang dilantik atau diberikuasa untuk mewakili, atau bertindak bagi pihak, pertubuhan berdaftar atau mana-mana cawangan pertubuhan itu, dalam apa-apa perkara, selain daripada seseorang yang, bukan seorang ahli pertubuhan itu, diambil oleh pertubuhan itu untuk mewakili, atau bertindak bagi pihak, pertubuhan atau mana-mana rancangan pertubuhan itu dalam keupayaan profesional atau melalui persetujuan kontrak.

(8) Mana-mana orang yang, sebelum sahaja mula kuatkuasanya seksyen ini, seseorang yang memegang jawatan, penasihat atau pekerja pertubuhan berdaftar boleh terus bertindak sedemikian sehingga tamat tempoh semasa jawatan atau perlantikan atau penamatan kontrak perkhidmatannya, mengikut mana yang berkenaan, walau juapun dia taklayak di bawah subseksyen (1).

10. Pemeriksaan dokumen dan nilai keterangan salinan yang diperakui oleh Pendaftar.

(1) Tertakluk kepada subseksyen (2), dokumen yang difailkan dengan Pendaftar atau Penolong Pendaftar menurut mana-mana

peruntukan Akta ini atau mana-mana peraturan yang dibuat di bawahnya dan apa-apa salinan bagi apa-apa perakuan, perintah, notis atau apa-apa dokumen lain yang dikeluarkan oleh Pendaftar atau Penolong Pendaftar menurut mana-mana peruntukan Akta ini atau mana-mana peraturan yang dibuat di bawahnya boleh, apabila fee yang ditetapkan dibayar—

- (a) diperiksa oleh mana-mana orang, atau
- (b) satu salinan baginya diperolehi oleh mana-mana orang daripada Pendaftar atau Penolong Pendaftar:

Dengan syarat bahawa orang yang meminta pemeriksaan atau salinan itu menyatakan tujuan baginya menghendaki salinan itu, dan Pendaftar berpuas hati bahawa tujuan itu adalah suatu tujuan yang sah di sisi undang-undang, dan bahawa pemeriksaan atau salinan itu tidaklah diminta oleh atau bagi pihak sesuatu pertubuhan yang tidak sah di sisi undang-undang.

(2) Tiada mana-mana orang, selain daripada seseorang yang Pendaftar berpuas hati adalah seorang ahli sesuatu pertubuhan, boleh memeriksa atau mendapat daripada Pendaftar atau Penolong Pendaftar buku kira-kira pertubuhan itu atau suatu salinan buku kira-kira itu.

(3) Suatu salinan atau cabutan daripada apa-apa dokumen yang diterima di pejabat Pendaftar atau Penolong Pendaftar, yang diperakui sebagai salinan atau cabutan yang benar dengan tandatangan dan meteri Pendaftar atau Penolong Pendaftar, hendaklah diterima dalam keterangan dalam mana-mana pembicaraan sebagai sama sahnyanya dengan dokumen asalnya.

11. Perubahan nama, tempat urusan dan aturan-aturan pertubuhan.

- (1) Tiadalah sesuatu pertubuhan berdaftar boleh—
 - (a) mengubah nama atau tempat urusannya; atau
 - (b) meminda aturan-aturannya,

[Pind. Akta
A1027]

dengan tiada terlebih dahulu mendapat kebenaran Pendaftar, dan sesuatu permohonan untuk apa-apa perubahan atau pindaan kepada aturan-aturannya hendaklah dibuat kepada Pendaftar dalam masa enam puluh hari dari tarikh keputusan hendak membuat perubahan atau pindaan itu.

(2) Jika sesuatu pertubuhan berdaftar tidak menurut seksyen ini, maka pertubuhan itu dan tiap-tiap pemegang-jawatan pertubuhan itu adalah melakukan suatu kesalahan terhadap Akta ini dan, apabila disabitkan, bolehlah dikenakan denda tidak lebih daripada tiga ribu ringgit.

[Pind. Akta
A1027]

(3) Bagi maksud-maksud seksyen ini—

- (a) perkataan “pinda” dan perkataan yang seumpamanya termasuk sesuatu aturan baru dan sesuatu ketetapan membatalkan sesuatu aturan; dan
- (b) perkataan “aturan-aturan” termasuk maksud-maksud dan tujuan-tujuan yang kerananya sesuatu pertubuhan ditubuhkan atau yang ia berusaha hendak mencapai, atau yang kerananya kumpulan-kumpulan wangnya, atau mana-mana daripadanya, boleh digunakan, kelayakan-kelayakan bagi menjadi anggota dan bagi memegang apa-apa jawatan, kaedah perlantikan atau pemilihan bagi apa-apa jawatan, aturan-aturan yang dengannya pertubuhan itu akan dikelolai dan kaedah dan cara bagaimana sesuatu hal yang di atas itu boleh dipinda.

11A. *(Dipotong oleh Akta A557).*

12. Cawangan pertubuhan.

(1) Tiadalah sesuatu pertubuhan berdaftar boleh menubuhkan sesuatu cawangan dengan tiada terlebih dahulu mendapat kebenaran Pendaftar.

(2) Pendaftar boleh tidak memberi kebenaran kepada penubuhan sesuatu cawangan pertubuhan berdaftar jika—

- (a) aturan-aturan pertubuhan itu tidak ada membuat peruntukan untuk menubuhkan sesuatu cawangan pertubuhan itu; atau
- (b) aturan-aturan cawangan pertubuhan itu adalah sedemikian hingga menjadikan cawangan pertubuhan itu suatu pertubuhan yang bebas yang tidak ada di bawah kelolaan pertubuhan itu dengan secukupnya.

(3) Jika sesuatu pertubuhan berdaftar menubuhkan suatu cawangan dengan tidak terlebih dahulu mendapat kebenaran Pendaftar maka cawangan yang ditubuhkan demikian itu hendaklah menjadi suatu pertubuhan yang menyalahi undang-undang:

Dengan syarat bahawa sesuatu cawangan bagi sesuatu pertubuhan

berdaftar yang ditubuhkan dan yang ada wujud sejurus sebelum berkuatkuasanya Akta ini tidaklah menjadi suatu pertubuhan yang menyalahi undang-undang jika dalam tempoh enam bulan daripada berkuatkuasanya Akta ini atau daripada apa-apa tempoh yang dilanjutkan, yang tidak lebih daripada tiga bulan, sebagaimana yang dibenarkan oleh Pendaftar, pertubuhan berdaftar itu membuat permohonan kepada Pendaftar dengan bertulis untuk kebenarannya di bawah seksyen ini; dan bagi menimbangkan permohonan ini Pendaftar adalah diberi segala kuasa yang diberi kepadanya oleh seksyen-kecil (2).

(4) Peruntukan Akta ini, lain daripada seksyen 6 (1), 7 dan 8 hendaklah dipakai bagi mana-mana cawangan sesuatu pertubuhan berdaftar yang dibenarkan di bawah seksyen ini seolah-olah cawangan itu adalah suatu pertubuhan berdaftar di bawah peruntukan Akta ini sebagaimana jua pertubuhan yang ia menjadi cawangan itu.

(5) Bagi maksud seksyen ini, sesuatu cawangan pertubuhan berdaftar adalah termasuk mana-mana pertubuhan yang dengan apa-apa jalan pun menjadi pertubuhan di bawah sesuatu pertubuhan lain.

(6) Jika kelulusan untuk menubuhkan suatu cawangan telah diberi, cawangan itu hendaklah ditubuhkan dalam tempoh tiga bulan dari tarikh kelulusan itu melainkan jika Pendaftar telah memberi perlanjutan masa.

13. Pembatalan dan penggantungan.

(1) Tertakluk kepada seksyen-kecil (2), Pendaftar boleh dalam hal-hal yang berikut, membatalkan pendaftaran mana-mana pertubuhan yang didaftarkan di bawah seksyen 7—

- (a) apabila pertubuhan dibubarkan oleh pertubuhan itu dan pembubaran itu disahkan mengikut cara sebagaimana yang dikehendaki oleh Pendaftar atau apabila pertubuhan itu dibubarkan oleh Pendaftar mengikut Akta ini;
- (b) atas perintah yang dibuat oleh Menteri di bawah seksyen 5;
- (c) jika Pendaftar puashati—
 - (i) bahawa pendaftarannya telah dilaksanakan oleh sebab tipuan atau kekhilafan atau salah nyataan mengenai apa-apa butir yang material;
 - (ii) bahawa pertubuhan itu mungkin digunakan bagi

maksud-maksud yang menyalahi undang-undang atau bagi maksud-maksud yang memudaratkan atau yang bertentangan dengan keamanan, kebajikan, ketenteraman atau akhlak di dalam Persekutuan;

(iii) bahawa pertubuhan itu adalah berusaha hendak mencapai tujuan-tujuan, lain daripada tujuan-tujuan yang ia didaftarkan;

(iv) bahawa pertubuhan telah melanggar secara bersengaja mana-mana peruntukan Akta ini atau mana-mana peraturan yang dibuat di bawahnya atau mana-mana kaedahnya atau bahawa mana-mana ahli pertubuhan telah lazim melanggar peruntukan seksyen 4 (1) Akta Pertubuhan 1948 dengan apa-apa perbuatan atau penyebaran yang mana seksyen 3 (1) (f) Akta itu terpakai;

(v) bahawa pertubuhan itu telah tidak wujud lagi;

[Pind. Akta
A1027]

(vi) bahawa pertubuhan itu telah gagal mematuhi suatu perintah yang dibuat oleh Pendaftar di bawah seksyen 13A;

(vii) bahawa pertubuhan itu telah tidak mematuhi peruntukan seksyen 2A;

[Mas. Akta
A1027]

(viii) bahawa pertubuhan itu telah melanggar peruntukan seksyen 52; atau

[Mas. Akta
A1027]

(ix) bahawa pertubuhan itu telah tidak mematuhi notis yang diberikan olehnya di bawah seksyen-kecil (1) seksyen 16; dan

[Mas. Akta
A1027]

(d) apabila pertubuhan itu menjadi pertubuhan yang menyalahi undang-undang di bawah seksyen 14 (7) kerana tidak memberikan maklumat bertulis.

(2) Jika Pendaftar bercadang hendak membatalkan pendaftaran mana-mana pertubuhan berdaftar di bawah perenggan (c) seksyen-kecil (1), Pendaftar—

[Gan. Akta
A1027]

(a) hendaklah memberitahu seorang pemegang jawatan pertubuhan itu atau lebih tentang niatnya hendak membatalkan pendaftaran pertubuhan itu; dan

(b) hendaklah memberinya atau mereka peluang untuk mengemukakan sebab-sebab secara bertulis dalam tempoh tiga puluh hari dari tarikh pemberitahuan itu mengapa pendaftaran itu tidak patut dibatalkan.

[Mas. Akta
A1027]

(2A) Pendaftar boleh, dalam tempoh yang dinyatakan dalam perenggan (b) seksyen-kecil (2), melalui perintah secara bertulis menggantung semua atau mana-mana kegiatan pertubuhan berdaftar itu—

(a) jika difikirkannya perlu berbuat demikian—

(i) bagi kepentingan awam; atau

(ii) bagi kepentingan pertubuhan berdaftar itu; atau

(b) untuk menghalang pertubuhan berdaftar itu daripada terus melanggar atau mencabuli mana-mana peruntukan dalam Akta ini, mana-mana peraturan yang dibuat di bawahnya atau mana-mana aturan pertubuhan itu.

[Mas. Akta
A1027]

(2B) Sesuatu perintah yang dibuat di bawah seksyen-kecil (2A)—

(a) boleh mengandungi apa-apa syarat yang difikirkan perlu atau mustahak oleh Pendaftar; dan

(b) hendaklah terus berkuatkuasa sehingga perintah itu dibatalkan atau sehingga pendaftaran pertubuhan itu dibatalkan.

[Mas. Akta
A1027]

(2C) Seseorang pemegang jawatan atau mana-mana orang yang menguruskan atau menolong dalam pengurusan sesuatu pertubuhan yang tidak mematuhi perintah yang dibuat di bawah seksyen-kecil (2A) adalah melakukan suatu kesalahan dan apabila disabitkan, boleh dikenakan denda tidak lebih daripada lima ribut ringgit, dan jika kesalahan itu ialah kesalahan yang berterusan, boleh, sebagai tambahan, dikenakan denda harian tidak lebih daripada lima ratus ringgit bagi setiap hari kesalahan itu berterusan selepas hari yang pertama.

(3) Jika Pendaftar membatalkan pendaftaran sesuatu pertubuhan berdaftar di bawah seksyen ini, maka peruntukan seksyen 17 hendaklah dipakai bagi pertubuhan berdaftar itu dan pembatalan itu hendaklah disiarkan dalam *Warta Kerajaan*.

13A. Kuasa Pendaftar membuat perintah tertentu berkenaan dengan pertubuhan berdaftar.

(1) Jika Pendaftar berpuas hati bahawa ia adalah perlu untuk berbuat sedemikian bagi kepentingan mana-mana pertubuhan berdaftar, atau bagi kepentingan ketenteraman, kesejahteraan dan keselamatan awam, atau selainnya bagi kepentingan awam, Pendaftar boleh pada bila-bila masa, selepas memberi pertubuhan itu suatu

peluang untuk membuat representasi kepadanya, membuat suatu perintah secara bertulis—

- (a) menghendaki pertubuhan itu, dalam masa yang dinyatakan dalam perintah, memperuntukkan dalam kaedah-kaedah atau perlembagaannya bahawa orang yang memegang jawatan dalam pertubuhan itu hendaklah seseorang warganegara Persekutuan, dan dalam pada itu, menghendaki pertubuhan itu meletak jawatan semua orang yang, bukan warganegara Persekutuan, yang adalah orang yang memegang jawatan dalam pertubuhan sebelum sahaja perintah itu dibuat; atau
- (b) melarang pertubuhan itu daripada mengadakan, atau secara langsung atau tidak langsung, apa-apa percantuman, perkaitan, perhubungan, atau apa-apa jua urusan lain, dengan mana-mana pertubuhan, organisasi, atau dengan mana-mana pihak berkuasa, pihak kerajaan atau selainnya, dalam mana-mana negara, kawasan atau tempat di luar Malaysia;
- (c) *(Dibatalkan oleh Akta A557).*

(2) Pendaftar boleh pada bila-bila masa, selepas memberi pertubuhan berdaftar itu suatu peluang untuk membuat representasi kepadanya, membuat suatu perintah bertulis menghendaki pertubuhan itu, dalam masa yang dinyatakan dalam perintah itu, meminda kaedah-kaedah atau perlembagaannya, supaya—

- (a) mematuhi, atau adalah konsisten dan mengikut, peruntukan-peruntukan Akta ini atau mana-mana peraturan yang dibuat di bawahnya; atau
- (b) mengeluarkan apa-apa ketaksaan atau keraguan di dalamnya, atau memperuntukkan bagi kejelasan dan ketepatan makna yang lebih baik dalam mana-mana peruntutannya; atau
- (c) memperuntukkan bagi apa-apa perkara lain yang Pendaftar boleh menghendakinya sebagai perlu, patut atau suaimanfaat.

(3) Jika Pendaftar membuat sesuatu perintah di bawah subseksyen (1) atau (2) dia bolehlah memasukkan ke dalam perintah itu, atau membuat atau memberi pada bila-bila masa selepasnya, apa-apa kehendak atau arahan berbangkit atau bersampingan berhubungan dengan perintah tersebut sebagaimana yang dia fikirkan perlu atau suaimanfaat untuk membuat atau memberinya.

(4) Pendaftar boleh, apabila permohonan secara bertulis dibuat kepadanya oleh sesuatu pertubuhan berdaftar, melanjutkan masa yang diberikan olehnya kepada pertubuhan itu dalam mana-mana perintah yang dibuat di bawah subseksyen (1) atau (2) jika dia berpuas hati bahawa pertubuhan itu telah memberi alasan-alasan yang baik dalam permohonannya dan adalah patut dan sesuai untuk memberi perlanjutan itu.

(5) Bagi maksud-maksud subseksyen (1), "orang yang memegang jawatan" termasuklah orang-orang yang dinyatakan dalam seksyen 9A (7) (a) dan (b).

(6) *(Dibatalkan oleh Akta A557).*

{Pind. Akta
A1027}

(7) Mana-mana pertubuhan yang melanggar apa-apa perintah yang diberi oleh Pendaftar di bawah subseksyen (1) atau (2) atau apa-apa kehendak atau arahan yang dibuat atau diberi olehnya di bawah subseksyen (3) adalah bersalah atas suatu kesalahan dan hendaklah dikenakan, apabila disabitkan, penjara selama suatu tempoh tidak melebihi lima tahun atau kepada suatu denda tidak melebihi lima belas ribu ringgit atau kedua-duanya.

14. Maklumat yang kena diberi oleh pertubuhan-pertubuhan, perintah Pendaftar supaya maklumat diberi, Pendaftar meluluskan audit dan perintah sementara untuk pembubaran.

{Pind. Akta
A1027}

(1) Tiap-tiap pertubuhan berdaftar hendaklah menghantarkan kepada Pendaftar dalam masa enam puluh hari selepas mengadakan mesyuarat agung tahunannya atau sekiranya tiada sesuatu mesyuarat agung diadakan, dalam tempoh enam puluh hari selepas berakhirnya setiap tahun kalendar—

- (a) suatu salinan yang benar dan lengkap bagi apa-apa pindaan kepada aturan-aturan pertubuhan itu yang dibuat semenjak tarikh pendaftaran atau semenjak tarikh penyata yang akhir;
- (b) suatu senarai yang benar dan lengkap mengenai pemegang-pemegang jawatan dan bilangan anggota-anggota pertubuhan itu yang tinggal atau yang ada di dalam Persekutuan pada tarikh penyata itu atau, sekiranya pertubuhan itu tiada seorang jua pun pemegang-jawatan yang tinggal atau yang ada di dalam Persekutuan, nama, alamat dan pekerjaan orang atau orang-orang di dalam

Persekutuan yang berkuasa menjalankan kerja untuk atau bagi pihak pertubuhan itu, dan bilangan anggota-anggota sebagaimana yang tersebut di atas itu bersama dengan suatu senarai yang benar dan lengkap mengenai pemegang-pemegang jawatan bagi segala cawangan (jika ada) pertubuhan itu;

(c) alamat pertubuhan itu atau alamat tempat urusan pertubuhan itu;

(d) kira-kira bagi tahun kewangan yang akhir bagi pertubuhan itu, bersama dengan suatu kunci kira-kira menunjukkan kedudukan kewangan pada penghujung tahun kewangan yang akhir bagi pertubuhan itu;

(da) nama dan alamat mana-mana pertubuhan, persatuan kesatuan sekerja atau mana-mana kumpulan orang lain, yang diperbadankan atau tak diperbadankan, di luar Persekutuan yang dengannya pertubuhan itu dengan apa-apa cara bersekutu atau bergabung; [Pind. Akta
A1027]

(db) perihalan apa-apa wang atau harta, apa-apa faedah atau keuntungan pekuniari yang diterima oleh pertubuhan itu daripada mana-mana orang yang lazimnya bermastautin di luar Malaysia atau suatu organisasi, pihak berkuasa, kerajaan, atau agensi mana-mana kerajaan, di luar Malaysia;

(e) apa-apa lain maklumat sebagaimana yang dikehendaki oleh Pendaftar dari semasa ke semasa.

(2) Pendaftar boleh, pada bila-bila masa dengan jalan notis yang ditandatangani, memerintah mana-mana pertubuhan berdaftar supaya memberi kepadanya dengan bertulis—

(a) suatu salinan yang benar dan lengkap mengenai aturan-aturan mana-mana pertubuhan itu yang berjalan kuatkuasa pada tarikh perintah itu;

(b) suatu senarai yang benar dan lengkap mengenai pemegang-jawatan dan anggota-anggota bagi mana-mana pertubuhan itu atau bagi mana-mana cawangan pertubuhan itu, yang tinggal atau yang ada di dalam Persekutuan pada tarikh perintah itu;

(c) suatu penyata yang benar dan lengkap berkenaan dengan bilangan mesyuarat-mesyuarat yang diadakan oleh

pertubuhan itu atau cawangannya di dalam Persekutuan dalam masa enam bulan sebelum daripada perintah itu menyatakan tempat atau tempat-tempat di mana mesyuarat-mesyuarat itu telah diadakan;

(d) kira-kira yang telah sempurna diaudit;

(da) nama dan alamat mana-mana pertubuhan, persatuan, kesatuan sekerja atau mana-mana kumpulan orang lain, yang diperbadankan atau tak diperbadankan, di luar Persekutuan yang bergabung dengan pertubuhan itu dan butir-butir lain yang berhubungan dengannya itu;

(db) perihalan apa-apa wang atau harta, apa-apa faedah atau keuntungan pekuniari yang diterima oleh pertubuhan itu daripada mana-mana orang yang lazimnya bermastautin di luar Malaysia atau suatu organisasi, pihak berkuasa, kerajaan, atau agensi mana-mana kerajaan, di luar Malaysia dan butir-butir lain yang berhubungan dengannya itu; atau

(e) apa-apa lain maklumat sebagaimana yang dikehendaki oleh Pendaftar dari semasa ke semasa.

(3) Sesuatu perintah yang diberi di bawah seksyen-kecil (2) dalam seksyen ini hendaklah menyatakan tempoh (yang tidak kurang daripada tujuh hari) maklumat itu dikehendaki diberi:

Dengan syarat bahawa Pendaftar boleh, menurut budibicaranya, apabila permohonan dibuat kepadanya dengan menunjukkan sebab-sebab yang cukup, membenarkan sesuatu lanjutan masa.

(4) Bagi maksud seksyen ini "telah sempurna diaudit" ertinya telah diaudit oleh seorang juruaudit yang diluluskan oleh Pendaftar, dan kelulusan itu boleh diberi oleh Pendaftar pada amnya atau untuk sesuatu audit yang tertentu; dan juruaudit yang diluluskan demikian itu hendaklah membuat suatu penyata atas kira-kira yang telah diperiksa olehnya mengikut bentuk sebagai yang dikehendaki oleh Pendaftar.

(5) Jika butir-butir yang dikehendaki diberi di bawah seksyen-kecil (2) tidak diberi dalam tempoh yang dinyatakan dalam perintah itu, atau dalam tempoh sesuatu lanjutan masa yang dibenarkan oleh Pendaftar, maka Pendaftar bolehlah membuat suatu perintah sementara bagi membubarkan pertubuhan itu.

(6) Jika sebelum habis tempoh tiga puluh hari dari tarikh perintah sementara itu butir-butir yang dikehendaki diberi di bawah seksyen-kecil (2) adalah diberi, maka Pendaftar bolehlah membatalkan perintah itu.

(7) Apabila habis tempoh tiga puluh hari dari tarikh perintah sementara itu atau, jika, ada sesuatu rayuan, apabila rayuan itu ditolak, maka perintah yang tersebut itu hendaklah menjadi mutlak dan pertubuhan itu hendaklah disifatkan sebagai suatu pertubuhan yang menyalahi undang-undang dan pendaftarannya hendaklah dibatalkan.

(8) Sesuatu pertubuhan berdaftar yang telah dibatalkan pendaftarannya di bawah seksyen 13 oleh kerana ia tidak menurut sesuatu perintah di bawah seksyen ini tidaklah berhak membuat permohonan untuk pendaftaran sehingga perintah itu telah diturut atau melainkan jika dibuktikan hingga memuaskan hati Pendaftar bahawa tak mungkin dapat menuruti perintah itu.

15. Orang-orang yang bertanggungjawab bagi memberi maklumat.

(1) Kewajipan-kewajipan yang dikenakan ke atas pertubuhan-pertubuhan berdaftar oleh seksyen 14 hendaklah mengikat tiap-tiap pemegang-jawatan dan tiap-tiap orang yang mengurus atau menolong dalam pengurusan mana-mana pertubuhan itu di dalam Malaysia:

Dengan syarat sentiasanya bahawa mana-mana pemegang-jawatan itu atau mana-mana orang yang tersebut di atas itu tidak boleh diikat demikian itu melainkan perintah yang diberi oleh Pendaftar telah disampaikan kepadanya.

(1A) Jika suatu notis, perintah, atau dokumen lain disampaikan kepada seorang yang tidak lagi menjadi pemegang-jawatan suatu pertubuhan berdaftar, dia hendaklah dengan serta-merta menyampaikan notis, perintah atau dokumen itu kepada pemegang-jawatan yang sedia ada bagi pertubuhan berdaftar itu atau, jika tidak diketahui, hendaklah mengembalikannya kepada Pendaftar atau Penolong Pendaftar yang menghantarkannya itu; dan mana-mana orang yang tidak berbuat demikian bolehlah, apabila disabitkan, dikenakan denda tidak lebih daripada tiga ribu ringgit.

[Pind. Akta
A1027]

(2) Jika mana-mana pertubuhan berdaftar tidak menurut kesemua

[Pind. Akta
A1027]

atau mana-mana bahagian daripada apa-apa perintah yang diberi di bawah seksyen 14 dalam Akta ini, maka tiap-tiap seorang yang tersebut dalam seksyen-kecil (1) yang telah disampaikan perintah yang tersebut di atas adalah melakukan suatu kesalahan dan, apabila disabitkan, bolehlah dikenakan denda tidak lebih daripada lima ribu ringgit melainkan jika ia menunjukkan hingga memuaskan hati Mahkamah bahawa ia telah menjalankan usaha yang semestinya dan telah tidak dapat menurut perintah itu kerana sebab-sebab yang tidak dapat dikawalinya.

(3) Jika apa-apa maklumat yang diberikan kepada Pendaftar bagi menurut sesuatu perintah yang diberi di bawah seksyen 14 adalah palsu, tidak betul atau tidak lengkap tentang mana-mana butir yang mustahak, maka orang yang telah memberikan maklumat itu adalah melakukan suatu kesalahan dan, apabila disabitkan, bolehlah dikenakan denda tidak lebih daripada seribu ringgit melainkan jika ia menunjukkan hingga memuaskan hati Mahkamah bahawa ia ada sebab-sebab yang cukup bagi mempercayai bahawa maklumat itu adalah benar, betul dan lengkap.

16. Pertikaian.

(1) Jika Pendaftar berpendapat bahawa sesuatu pertikaian telah berlaku di antara anggota-anggota atau pemegang-pemegang jawatan sesuatu pertubuhan berdaftar dan oleh sebab itu Pendaftar tidak puashati tentang siapakah yang telah dilantik dengan betulnya sebagai pemegang-pemegang-jawatan pertubuhan itu, maka Pendaftar boleh menyampaikan notis kepada pertubuhan itu menghendaki pertubuhan itu, dalam masa sebulan dari tarikh notis itu disampaikan, supaya menunjukkan kepadanya keterangan-keterangan mengenai penyelesaian sesuatu pertikaian itu dan mengenai perlantikan yang betul dibuat bagi pemegang-pemegang-jawatan yang sah di sisi undang-undang bagi pertubuhan itu atau mengenai langkah-langkah pembicaraan yang telah diambil untuk menyelesaikan pertikaian itu.

[Pind. Akta
A1027]

(2) Jika mana-mana notis sebagaimana yang diperuntukkan oleh seksyen-kecil (1) tidak diturut hingga memuaskan hati Pendaftar dalam tempoh sebulan atau dalam sesuatu masa lanjutan yang dibenarkan oleh Pendaftar, maka Pendaftar bolehlah mengambil langkah untuk membatalkan pendaftaran pertubuhan itu di bawah seksyen 13.

17. Akibat perintah Menteri di bawah seksyen 5, penolakan pendaftaran pertubuhan tempatan oleh Pendaftar di bawah seksyen 7 dan pembatalan pendaftaran sesuatu pertubuhan berdaftar di bawah seksyen 13.

(1) Apabila sesuatu perintah dibuat oleh Menteri di bawah seksyen 5 atau apabila Pendaftar menolak pendaftaran sesuatu pertubuhan tempatan di bawah seksyen 7, atau apabila pendaftaran sesuatu pertubuhan berdaftar dibatalkan di bawah mana-mana peruntukan dalam Akta ini maka hendaklah terbit akibat-akibat yang berikut—

(a) harta pertubuhan itu hendaklah serta-merta terletak di tangan Pegawai Muflis atau, jika sekiranya mana-mana pegawai lain, sebagaimana yang tersebut dalam perintah yang dibuat di bawah Seksyen 5, dilantik oleh Menteri bagi maksud menyelesaikan urusan hal-ehwal pertubuhan itu, maka harta pertubuhan itu hendaklah serta-merta terletak di tangan pegawai itu;

(b) Pegawai Muflis atau pegawai lain yang tersebut di atas itu hendaklah mengambil langkah bagi menyelesaikan urusan hal-ehwal pertubuhan itu dan, setelah menunaikan dan mengadakan peruntukan bagi segala hutang dan tanggungan pertubuhan itu dan belanja-belanja bagi menyelesaikan urusan itu, hendaklah membayarkan harta pertubuhan yang lebih itu, jika ada—

(i) kepada Kumpulan Wang Disatukan jika pendaftaran telah ditolak atau dibatalkan menurut kuasa suatu perintah di bawah seksyen 5 atau atas alasan-alasan yang dinyatakan dalam seksyen 7 (3) (a) atau 13 (1) (c) (ii) atau jika anggota-anggota pertubuhan itu meminta sedemikian, dan Menteri mengarahkan sedemikian supaya aset yang berlebihan itu dibayar kepada Kumpulan Wang Disatukan;

(ii) dalam segala hal lain, kepada anggota-anggota pertubuhan mengikut kaedah-kaedah pertubuhan itu, atau jika tidak ada kaedah-kaedah sedemikian, maka Pegawai Pemegang Harta atau mana-mana pegawai lain hendaklah menyediakan suatu skim bagi penggunaan aset yang lebih itu untuk kelulusan Mahkamah Tinggi; [Gan. Akta
A859]

- (c) permohonan untuk kelulusan rancangan itu hendaklah dibuat dengan jalan saman yang memulakan dan boleh dipinda oleh Mahkamah sebagaimana yang difikirkannya patut mengikut keadaan halnya;
- (d) apabila kelulusan Mahkamah tentang rancangan itu atau rancangan yang dipinda itu telah didapati, maka harta yang lebih itu yang menjadi perkara rancangan itu hendaklah dipegang dan digunakan oleh Pegawai Muflis atau oleh pegawai lain sebagaimana yang tersebut di atas mengikut syarat-syarat dan bagi maksud-maksud yang ditetapkan dalam perintah Mahkamah itu; dan
- (e) bagi maksud menyelesaikan urusan hal-ehwal pertubuhan itu, Pegawai Muflis atau pegawai lain sebagaimana yang tersebut di atas adalah diberi segala kuasa yang terletak di tangan Pegawai Muflis menurut mana-mana undang-undang bertulis berhubung dengan kemuflian bagi maksud mengetahui dan mendapati harta-harta seseorang yang berhutang, dan juga apa-apa kuasa sebagaimana yang terletak di tangan pembubar rasmi, menurut mana-mana undang-undang bertulis berhubung dengan syarikat-syarikat dan segala peruntukan undang-undang yang tersebut itu berhubung dengan kemuflian dan penyelesaian urusan syarikat-syarikat setakat mana peruntukan itu berhubung dengan mengetahui dan mendapati harta seseorang yang berhutang dan dengan penyelesaian urusan sesuatu syarikat, hendaklah *mutatis mutandis*, dipakai bagi menyelesaikan hal-ehwal pertubuhan itu di bawah Akta ini.

(2) Pendaftar boleh, menggantung kuatkuasa seksyen ini setakat mana dan selama tempoh yang difikirkannya patut.

(3) Pendaftar atau Pegawai Pemegang Harta boleh menghendaki atau membenarkan badan pengelola pertubuhan itu, yang merupakan badan pengelola yang wujud sebelum sahaja mula berkuatkuasanya subseksyen (1) berhubung dengan pertubuhan itu, atau mana-mana anggota badan pengelola itu, atau mana-mana orang yang telah ketikaitu atau pada bila-bila masa dahulunya menjadi pemegang-jawatan, anggota atau pekerja pertubuhan itu, supaya memberi

kepada Pendaftar atau Pegawai Pemegang Harta, mengikut mana yang berkenaan, atau kepada mana-mana orang lain sebagaimana yang dinyatakan oleh Pendaftar atau Pegawai Pemegang Harta, apa-apa maklumat berhubungan dengan harta, hal-ehwal, urusan, akaun atau buku pertubuhan itu, atau apa-apa perkara lain yang berhubungan dengan pertubuhan itu, yang mungkin dikehendaki bagi maksud-maksud seksyen ini, dan, kecuali sebagaimana yang diperuntukkan di bawah subseksyen (4), badan pengelola itu, atau anggotanya, atau pemegang jawatan, anggota atau pekerja itu, tidaklah oleh sebab apa-apa jua perkara yang dilakukan olehnya menurut kehendak atau pembenaran itu, melakukan apa-apa kesalahan di bawah Akta ini, dengan syarat perkara itu adalah sebaliknya dilakukan menurut undang-undang.

(4) Jika badan pengelola pertubuhan itu, atau mana-mana anggotanya yang tertentu, atau mana-mana orang yang telah menjadi pemegang-jawatan, anggota atau pekerja pertubuhan itu pada bila-bila masa sebelum mula berkuatkuasanya subseksyen (1) berhubungan dengan pertubuhan itu, tidak mematuhi apa-apa kehendak Pendaftar atau Pegawai Pemegang Harta di bawah subseksyen (3), atau melakukan apa-apa jua perkara di luar bidang, atau yang berlawanan dengan, apa-apa pembenaran Pendaftar atau Pegawai Pemegang Harta di bawah subseksyen (3), setiap anggota badan pengelola itu, atau anggotanya yang tertentu itu, atau pemegang-jawatan, anggota atau pekerja itu, mengikut mana yang berkenaan, adalah melakukan suatu kesalahan dan, apabila disabitkan, boleh dikenakan penjara selama tempoh tidak lebih daripada lima tahun atau denda tidak lebih daripada sepuluh ribu ringgit atau kedua-duanya.

(5) Bagi maksud-maksud subseksyen (3) dan (4), "pemegang-jawatan" termasuklah mana-mana orang yang tersebut dalam perenggan (a), (b) dan (c) subseksyen (7) seksyen 9A.

(6) Bagi mengelakkan keraguan, adalah dengan ini diisytiharkan bahawa jika harta sesuatu pertubuhan terletak pada Pegawai Pemegang Harta di bawah perenggan (a) subseksyen (1), maka harta tiap-tiap cawangan pertubuhan itu, tidak kira sama ada ia suatu cawangan yang menurut undang-undang atau yang menyalahi undang-undang, hendaklah juga terletak pada Pegawai Pemegang Harta, dan peruntukan-peruntukan perenggan (b), (c), (d) dan (e) subseksyen (1), dan subseksyen (2), (3), (4) dan (5) hendaklah dengan demikian itu terpakai bagi tiap-tiap cawangan itu dan hartanya.

(7) Bagi maksud-maksud subseksyen (3), (4), (5) dan (6), "Pegawai Pemegang Harta" termasuklah, berhubungan dengan suatu pertubuhan yang berkenaan dengannya suatu perintah telah dibuat oleh Menteri di bawah seksyen 5, mana-mana pegawai lain yang mengikut terma-terma perintah itu, telah dilantik oleh Menteri bagi maksud penggulingan hal-ehwal pertubuhan itu.

17A. Pemakaian seksyen 17 bagi cawangan yang menyalahi undang-undang.

Jika cawangan sesuatu pertubuhan—

- (a) telah diisytiharkan sebagai menyalahi undang-undang melalui suatu perintah Menteri di bawah seksyen 5;
- (b) diberitahu oleh Pendaftar kepada Pegawai Pemegang Harta sebagai suatu pertubuhan yang menyalahi undang-undang di bawah perenggan (c) subseksyen (1) seksyen 41; atau
- (c) telah, dengan cara apa jua pun selainnya, menjadi suatu pertubuhan yang menyalahi undang-undang di bawah subseksyen (1) seksyen 41,

maka peruntukan-peruntukan seksyen 17 hendaklah terpakai bagi cawangan itu dan hartanya mengikut cara yang sama seperti ia terpakai bagi sesuatu pertubuhan dan hartanya, dan sebutan dalam subseksyen (3) dan (4) seksyen 17 mengenai badan pengelola sesuatu pertubuhan hendaklah dalam hal yang sedemikian ditafsirkan dengan sewajarnya sebagai sebutan mengenai badan pengelola cawangan yang berkenaan, dan sebutan dalam subseksyen (6) seksyen 17 mengenai cawangan sesuatu pertubuhan hendaklah dalam hal yang sedemikian ditafsirkan dengan sewajarnya sebagai sebutan mengenai cawangan yang di bawah cawangan yang berkenaan itu.

17B. Perletakhakan pada pertubuhan berdaftar baru akan harta suatu pertubuhan yang pendaftarannya telah dibatalkan.

(1) Jika harta mana-mana pertubuhan telah terletak pada Pegawai Pemegang Harta di bawah perenggan (a) subseksyen (1) seksyen 17, maka walau apa pun subperenggan (ii) perenggan (b) subseksyen (1) seksyen 17, Pegawai Pemegang Harta boleh, jika dia berpuas hati bahawa suatu pertubuhan lain telah didaftarkan di bawah Akta ini (kemudian daripada ini disebut "pertubuhan baru") dan perlembagaan dan kaedah-kaedah pertubuhan baru adalah pada matanya serupa dengan perlembagaan dan kaedah-kaedah pertubuhan

berdaftar itu yang pendaftarannya telah dibatalkan oleh Pendaftar di bawah seksyen 13 (kemudian daripada ini disebut "pertubuhan lama") dan bahawa sebilangan besar orang yang menjadi anggota menurut undang-undang dalam pertubuhan lama sebelum sahaja pembatalan pendaftarannya adalah anggota pertubuhan baru memohon kepada Mahkamah Tinggi untuk suatu perintah bagi meletakkan segala aset, hutang dan liabiliti pertubuhan lama dan segala cawangannya pada pertubuhan baru, dengan syarat Pegawai Pemegang Harta telah mula-mulanya menerima permintaan bertulis dan juga mendapat kebenaran bertulis daripada badan pengelola pertubuhan baru bagi perletakkan tersebut dan suatu akujanji bertulis yang menyatakan bahawa pertubuhan baru itu akan mengambilalih tanggungjawab bagi segala hutang dan liabiliti yang disebut terdahulu yang sedia ada ketika itu, dan Mahkamah boleh, jika ia berpuas hati tentang segala perkara yang dinyatakan sebelum daripada ini, meluluskan permohonan itu dengan apa-apa ubahsuaian atau ubahan sebagaimana yang dikehendaki mengikut keadilan hal itu.

(2) Permohonan itu hendaklah dibuat dengan cara saman pemula yang hendaklah diiklankan dengan menyiarkannya dalam *Warta* dan dalam dua akhbar, satu dalam akhbar bahasa kebangsaan dan satu lagi dalam akhbar Inggeris, yang beredar di Malaysia, dan mana-mana orang yang mungkin terjejas atau tidak puas hati dengan keputusan Mahkamah atas sifatnya sebagai anggota pertubuhan lama atau pertubuhan baru atau sebagai pemiutang pertubuhan lama bolehlah memohon kepada Mahkamah untuk hadir dan membuat tuntutan mengenainya itu mengikut kaedah-kaedah Mahkamah Tinggi.

(3) Mana-mana orang yang telah menjadi anggota menurut undang-undang dalam pertubuhan lama sebelum sahaja pembatalan pendaftarannya yang bukan seorang anggota dalam pertubuhan baru yang tidak membantah terhadap permohonan Pegawai Pemegang Harta hendaklah terlepas daripada segala liabiliti persendirian bagi segala hutang dan liabiliti pertubuhan lama dan segala cawangannya bila sahaja perintah yang diminta oleh Pegawai Pemegang Harta itu dibuat.

(4) (*Dipotong*).

(5) Apabila suatu perintah perletakhakan dibuat oleh Mahkamah di bawah subseksyen (1), segala harta yang termasuk di dalamnya itu hendaklah terletak dengan sewajarnya pada pertubuhan baru itu tanpa apa-apa pindahhak, pindahmilik atau serahhak selanjutnya.

(6) Walaupun permohonan di bawah subseksyen (1) belum selesai dalam Mahkamah, adalah sah menurut undang-undang bagi Pegawai Pemegang Harta untuk melakukan atau mengambil apa-apa tindakan sebagaimana yang perlu untuk menguruskan apa-apa harta atau melepaskan hutang dan liabiliti pertubuhan lama seolah-olah permohonan itu telah tidak dibuat.

(7) Jika Mahkamah meluluskan permohonan di bawah subseksyen (1) dengan atau tanpa ubahsuaian atau ubahan, maka Pegawai Pemegang Harta hendaklah menyiarkan keputusan itu dalam *Warta* dan dalam dua akhbar, satu dalam akhbar bahasa kebangsaan dan satu lagi dalam akhbar Inggeris, yang beredar di Malaysia, dan sesudah itu Pegawai Pemegang Harta hendaklah terlepas sepenuhnya daripada segala tanggungjawab dan liabilitinya dalam perkara itu.

(8) Segala kos dan belanja yang dilakukan oleh Pegawai Pemegang Harta dalam perkara itu hendaklah dibayar daripada aset pertubuhan lama dan segala cawangannya, dengan diberi keutamaan daripada segala hutang dan liabiliti lain.

(9) Segala suratikatan, bon, perjanjian, suratcara dan perkiraan kerja yang ada sebelum sahaja penyiaran dalam *Warta* akan keputusan Mahkamah yang meluluskan permohonan Pegawai Pemegang Harta di bawah subseksyen (1) hendaklah mempunyai kuatkuasa dan kesan sepenuhnya terhadap atau yang memihak pertubuhan baru dan boleh dikuatkuasakan dengan sepenuhnya dan berkesannya seolah-olah pertubuhan baru telah dinamakan di dalamnya atau telah menjadi satu pihak kepadanya dan bukan pertubuhan lama, atau mana-mana orang yang bertindak bagi pihak pertubuhan lama.

(10) Peruntukan-peruntukan subseksyen (3), (4) dan (5) seksyen 17 hendaklah terpakai berhubung dengan seksyen ini meng-

ikut cara yang sama sebagaimana ia terpakai berhubungan dengan seksyen 17.

18. Rayuan.

Mana-mana pertubuhan tempatan, pemegang-jawatan atau anggota pertubuhan tempatan itu atau mana-mana orang lain yang musykil dengan keputusan Pendaftar dalam mana-mana hal yang berikut—

- (a) pembatalan pendaftaran pertubuhan di bawah seksyen 2A;
- (b) keengganan mendaftarkan pertubuhan itu di bawah seksyen 7;
- (c) keengganan memberi pengecualian di bawah seksyen 9A (4) kepada orang berkelayakan memegang jawatan dalam mana-mana pertubuhan berdaftar;
- (d) keengganan meluluskan penukaran nama atau tempat urusan pertubuhan itu, atau pindaan kepada kaedah-kaedahnya di bawah seksyen 11;
- (e) keengganan meluluskan penubuhan suatu cawangan pertubuhan di bawah seksyen 12;
- (f) pembatalan pendaftaran pertubuhan di bawah seksyen 13;
- (g) perintah melarangkan orang-orang bukan warganegara dari memegang jawatan dalam suatu pertubuhan atau melarangkan gabungan, hubungan, komunikasi atau urusan-urusan lain dengan mana-mana pertubuhan di luar Persekutuan dan perkara-perkara lain yang dinyatakan dalam seksyen 13A (1);
- (h) perintah supaya meminda kaedah-kaedah atau perlembagaannya di bawah seksyen 13A (2);
- (i) keengganan meluluskan seorang juruaudit atau meluluskan seorang juruaudit yang tak dapat diterima oleh pertubuhan di bawah seksyen 14 (4);
- (j) pembuatan suatu perintah sementara untuk membubarkan pertubuhan di bawah seksyen 14 (5);
- (k) pembatalan pendaftaran suatu pertubuhan berdaftar di bawah seksyen 16 kerana gagal menyelesaikan pertikaian dalam pertubuhan; atau

- (I) keengganan memberi kebenaran di bawah seksyen 49 untuk menjadi seorang pemegang-jawatan,

boleh, dalam masa tiga puluh hari dari tarikh keputusan Pendaftar itu, merayu terhadap keputusan itu kepada Menteri; dan Menteri boleh mengesahkan, menolak atau mengubah keputusan Pendaftar itu, dan keputusan Menteri itu adalah muktamad.

[Mas. Akta
A743]

BAHAGIAN IA
PERUNTUKAN-PERUNTUKAN YANG TERPAKAI BAGI
PARTI-PARTI POLITIK SAHAJA

18A. Pemakaian Bahagian I dan III.

Peruntukan-peruntukan yang terkandung dalam Bahagian ini hendaklah terpakai, sebagai tambahan kepada peruntukan-peruntukan yang terkandung dalam Bahagian I dan Bahagian III, bagi parti-parti politik yang berdaftar di bawah Akta ini dan jika ada apa-apa percanggahan atau ketakkonsistenan di antara mana-mana peruntukan dalam Bahagian ini dengan mana-mana peruntukan dalam mana-mana Bahagian lain Akta ini, peruntukan dalam Bahagian ini hendaklah mengatasi setakat percanggahan atau ketakkonsistenan itu.

18B. Hal keadaan yang tidak menjadikan sesuatu pemilihan tak sah.

(1) Tiada pemilihan dalam mana-mana parti politik boleh menjadi tak sah oleh sebab apa-apa kegagalan untuk mematuhi mana-mana peruntukan perlembagaan parti politik itu atau mana-mana kaedah atau peraturan yang dibuat di bawahnya, atau oleh sebab mana-mana orang yang hilang kelayakan daripada menjadi anggota atau pemegang jawatan di bawah Akta ini atau perlembagaan parti politik itu telah mengambil bahagian dalam pemilihan itu, jika didapati oleh parti politik itu atau mana-mana orang yang diberikuasa olehnya atau oleh perlembagaannya atau kaedah-kaedah atau peraturan-peraturan yang dibuat di bawahnya, bahawa keputusan pemilihan itu akan tetap sama sekiranya tidak ada apa-apa kegagalan untuk mematuhi mana-mana peruntukan sedemikian, atau sekiranya orang itu telah tidak mengambil bahagian dalam pemilihan itu, mengikut mana-mana yang berkenaan.

(2) Jika seseorang yang hilang kelayakan di bawah Akta ini atau perlembagaan sesuatu parti politik dipilih memegang apa-apa jawatan

dalam mana-mana pemilihan parti politik itu, maka, apabila kehilangan kelayakannya itu diketahui, parti politik itu hendaklah, walaupun pemilihan itu sah menurut subseksyen (1), memberikan efek kepada kehilangan kelayakannya itu dan menjalankan suatu pemilihan baru berkenaan dengan jawatan itu dengan seberapa segera yang praktis mengikut perlembagaan, kaedah-kaedah dan peraturan-peraturannya.

18c. Keputusan parti politik adalah muktamad dan konklusif.

Keputusan sesuatu parti politik atau mana-mana orang yang diberikuasa olehnya atau oleh perlembagaannya atau kaedah-kaedah atau peraturan-peraturan yang dibuat di bawahnya tentang pentafsiran perlembagaan, kaedah-kaedah atau peraturan-peraturannya atau tentang apa-apa perkara yang berhubungan dengan hal-ehwal parti itu adalah muktamad dan konklusif dan keputusan itu tidak boleh dicabar, dirayukan, dikaji semula, dibatalkan atau dipersoalkan di mana-mana mahkamah atas apa-apa alasan, dan tiada mahkamah mempunyai bidang kuasa untuk melayani atau memutuskan apa-apa guaman, permohonan, soal atau prosiding atas apa-apa alasan berkenaan dengan keesahan keputusan itu.

BAHAGIAN 2

PERUNTUKAN-PERUNTUKAN YANG DIPAKAI BAGI PERTUBUHAN-PERTUBUHAN FAEDAH BERSAMA SAHAJA

19. Pemakaian Bahagian 1 dan 3.

Peruntukan yang terkandung dalam Bahagian ini hendaklah dipakai sebagai tambahan kepada peruntukan yang terkandung dalam Bahagian 1 dan Bahagian 3 berkenaan dengan pertubuhan-pertubuhan faedah bersama yang didaftarkan di bawah Akta ini dan perkataan "pertubuhan berdaftar" hendaklah dalam Bahagian ini, bererti pertubuhan itu.

20. Kecualian.

Tiadalah apa-apa jua pun dalam Akta ini boleh dipakai bagi mana-mana orang, badan atau pertubuhan yang baginya Akta Insuran, 1963 dipakai dan dengan ini adalah ditetapkan bahawa mana-mana pertubuhan faedah bersama yang telah didaftarkan di bawah Akta ini hendaklah disifatkan sebagai bukan suatu penginsuran bagi maksud Akta Insuran yang tersebut di atas dan bahawa peruntukan seksyen 67 dalam Ordinan Setem, 1949 tidaklah boleh dipakai bagi mana-mana pertubuhan faedah bersama itu.

21. Sekatan atas pendaftaran pertubuhan-pertubuhan faedah bersama.

(1) Sesuatu pertubuhan faedah bersama tidaklah berhak didaftarkan di bawah seksyen 7 jika aturan-aturan pertubuhan faedah bersama itu mengadakan peruntukan untuk—

[Pind. Akta
A1027]

(a) sesuatu faedah lebih daripada dua ribu ringgit bagi satu-satu hal;

(b) kemasukan seseorang anggota atau peyuran yang berumur lebih daripada enam puluh lima tahun, melainkan jika anggota itu adalah menginsurankan seorang lain yang berumur tidak lebih daripada enam puluh lima tahun; atau

[Gan. Akta
A1027]

(c) kemasukan anggota atau peyuran yang tidak tinggal di dalam kawasan sesuatu bandar di dalam Malaysia di mana pertubuhan itu bercadang hendak menjalankan urusannya:

Dengan syarat bahawa jika sesuatu pertubuhan faedah bersama ditubuhkan di suatu tempat kerja yang tertentu bagi faedah anggota atau peyurannya, pertubuhan itu adalah berhak didaftarkan walaupun aturan pertubuhan itu mengadakan peruntukan bagi kemasukan anggota atau penyuran yang tinggal di luar kawasan bandar di mana pertubuhan itu bercadang hendak menjalankan urusannya;

atau melainkan jadual-jadual carum yang akan dibayar oleh anggota-anggota pertubuhan faedah bersama itu dan aturan-aturannya berkenaan dengan faedah-faedah yang kena dibayar kepada anggota-anggotanya, berkenaan dengan jagaan, pelaburan dan penilaian berkala akan barang-barang, harta dan tanggungan-tanggungannya yang diperakui oleh seorang akcuari yang diluluskan oleh Menteri dihantar kepada Pendaftar bersama dengan permohonan untuk pendaftaran.

[Pind. Akta
A1027]

(2) Bagi maksud seksyen ini “bandar” termasuklah mana-mana kampung, mukim, perbandaran atau bandaraya.

22. Keanggotaan bagi orang-orang yang belum cukup umur.

(1) Aturan-aturan sesuatu pertubuhan berdaftar boleh mengadakan peruntukan untuk kemasukan seseorang yang berumur kurang daripada dua puluh satu tahun sebagai seorang anggota atau peyuran.

(2) Mana-mana anggota atau peyuran itu boleh, sekiranya ia berumur lebih daripada enam belas tahun, dengan sendirinya dan

sekiranya ia berumur kurang daripada itu, oleh ibu-bapa atau penjaganya, menyempurnakan segala suratcara dan memberi segala penyelesaian yang perlu disempurnakan atau diberi di bawah aturan-aturan itu, akan tetapi tidak boleh menjadi seorang ahli jawatankuasa, atau seorang pemegang amanah, setiausaha, pengurus atau bendahari bagi pertubuhan berdaftar itu.

23. Sekatan ke atas penama-penama.

Tiada mana-mana ahli atau pencarum sesuatu pertubuhan berdaftar boleh dinamakan sebagai orang yang akan menerima faedah-faedah yang diperuntukkan di bawah kaedah-kaedah pertubuhan, seseorang yang lain daripada suami, isteri, anak-anak (termasuk anak angkat), cucu, emak, bapa, emak mertua, bapa mertua, menantu lelaki, menantu perempuan, saudara lelaki atau perempuan yang sedarah, saudara lelaki atau perempuan yang separuh darah, anak-anak saudara lelaki atau perempuan yang sedarah atau separuh darah, pakcik atau makcik yang sedarah, pakcik atau makcik yang separuh darah atau anak-anak pakcik atau makcik yang sedarah atau separuh darah dengan ahli atau pencarum itu:

Dengan syarat bahawa seseorang ahli atau pencarum boleh menamakan mana-mana orang lain secara bertulis yang ditandatangani olehnya sendiri di hadapan dan diakusaksi oleh seorang Jaksa Pendamai atau Majistret atau Pendaftar.

24. Kedahuluan apabila pemegang-jawatan mati, menjadi muflis, dsb.

Dalam hal-hal yang berikut, iaitu—

- (a) apabila seseorang pemegang-jawatan pertubuhan berdaftar mati atau menjadi muflis dengan ada memiliki oleh sebab jawatannya apa-apa wang atau harta yang dipunyai oleh pertubuhan itu; atau
- (b) sekiranya apa-apa pelaksanaan, penahanan atau lain-lain perintah dikeluarkan atau apa-apa tindakan dijalankan terhadap pemegang-jawatan itu atau terhadap hartanya,

maka waris-waris pesaka, wasi-wasi atau pentadbir-pentadbirnya atau Pegawai Muflis atau Belip Mahkamah Tinggi atau lain-lain

orang yang melaksanakan perintah itu atau pihak yang menjalankan tindakan itu hendaklah, apabila dituntut dengan bertulis oleh pemegang-pemegang amanah pertubuhan berdaftar itu atau oleh mana-mana dua orang daripada mereka itu atau oleh mana-mana orang yang diberi kuasa oleh pertubuhan berdaftar itu bagi membuat tuntutan itu, membayar wang itu dan menyerahkan harta itu kepada pemegang-pemegang amanah pertubuhan berdaftar itu dahulu daripada membayar apa-apa hutang atau tuntutan lain terhadap harta pesaka pemegang-jawatan itu.

25. Perlantikan pemegang-pemegang amanah.

(1) Tiap-tiap pertubuhan berdaftar hendaklah ada seorang atau beberapa orang pemegang amanah.

(2) Tiadalah seseorang jua pun boleh dilantik menjadi seorang pemegang amanah pertubuhan berdaftar jika ia adalah memegang jawatan setiausaha atau bendahari bagi pertubuhan berdaftar itu.

(3) Seseorang pemegang amanah hendaklah dilantik dalam suatu mesyuarat pertubuhan berdaftar itu serta menurut ketetapan lebihsuara anggota-anggota yang hadir dan berhak mengundi di dalam mesyuarat itu.

(4) Sesuatu pertubuhan berdaftar hendaklah menghantar kepada Pendaftar suatu salinan tiap-tiap ketetapan melantik seorang pemegang amanah dan salinan itu hendaklah ditandatangani oleh pemegang amanah yang dilantik demikian itu dan oleh setiausaha pertubuhan berdaftar itu.

26. Audit.

(1) Tiap-tiap pertubuhan berdaftar hendaklah sekurang-kurangnya sekali pada tiap-tiap tahun mengemukakan kira-kiranya untuk diaudit oleh seorang juruaudit diluluskan oleh Pendaftar pada amnya atau untuk sesuatu audit yang tertentu.

(2) Juruaudit adalah berhak melihat segala buku dan kira-kira pertubuhan berdaftar itu dan hendaklah memeriksa penyata tahunan yang dikehendaki oleh Akta ini dan mengesahkan penyata tahunan itu dengan membandingkannya dengan kira-kira dan baucer-baucer berhubung dengannya dan hendaklah sama ada menandatangani penyata tahunan itu yang didapatinya betul, sempurna disokong

serta mengikut undang-undang dan aturan-aturan bagi pertubuhan berdaftar itu atau hendaklah khasnya menyatakan kepada pertubuhan berdaftar itu perkara-perkara yang didapatinya tidak betul, tidak disokong, atau tidak mengikut undang-undang.

27. Permintaan maklumat dan pemeriksaan buku-buku dan suratan-suratan oleh Pendaftar.

(1) Tiap-tiap pertubuhan berdaftar hendaklah memberi kepada Pendaftar atau Penolong Pendaftar apa-apa maklumat berkenaan dengan pertubuhan itu sebagaimana yang dikehendakinya pada bila-bila masa.

(2) Tiap-tiap pertubuhan berdaftar hendaklah, jika diminta dengan bertulis oleh Pendaftar atau Penolong Pendaftar, menunjukkan untuk pemeriksaannya—

- (a) suratan-suratan hakmilik bagi apa-apa harta yang dipegang oleh pertubuhan itu;
- (b) segala buku kira-kira dan buku keanggotaan pertubuhan itu; dan
- (c) apa-apa minit perjalanan pertubuhan itu atau lain-lain rekod bertulis pertubuhan itu.

(3) Setiausaha pertubuhan berdaftar hendaklah, apabila notis disampaikan kepada pertubuhan itu oleh Pendaftar atau Penolong Pendaftar, memberi kuasa dengan bertulis kepada Bank di mana kira-kira pertubuhan itu disimpan supaya menyatakan kepada Pendaftar atau Penolong Pendaftar itu kira-kira pertubuhan itu dan suratan-suratan yang bersangkutan dengannya.

28. Hak memberi salinan aturan-aturan.

Tiap-tiap pertubuhan berdaftar hendaklah memberi kepada mana-mana orang suatu salinan aturan-aturan pertubuhan itu apabila diminta dan dibayarnya wang sebanyak tidak lebih daripada lima ringgit.

[Pind. Akta
A1027]

29. Hak memberi salinan penyata tahunan.

Tiap-tiap pertubuhan berdaftar hendaklah memberi dengan percuma kepada tiap-tiap anggota atau peyuran atau orang yang ada mempunyai sesuatu kepentingan dalam kumpulan-kumpulan wangnya apabila diminta olehnya sama ada—

- (a) suatu salinan penyata tahunan yang akhir bagi pertubuhan itu; atau
- (b) kunci kira-kira atau lain-lain suratan yang telah sempurna diaudit mengandungi butir-butir yang sama dengan yang terkandung dalam penyata tahunan itu tentang penerimaan dan perbelanjaan, kumpulan-kumpulan wang dan harta pertubuhan itu.

30. Pemeriksaan buku-buku oleh anggota.

Seseorang anggota atau peyuran atau seseorang yang ada mempunyai sesuatu kepentingan dalam kumpulan-kumpulan wang pertubuhan berdaftar boleh memeriksa buku-buku pertubuhan itu pada bila-bila masa yang munasabah di pejabat berdaftar pertubuhan itu atau di mana-mana tempat buku-buku itu disimpan.

31. Yuran dan faedah.

(1) Jumlah yang dipotong oleh sesuatu pertubuhan berdaftar untuk pentadbiran atau lain-lain belanja tidak boleh, kecuali dengan kebenaran Pendaftar, lebih daripada sesuatu peratus daripada jumlah yuran atau sesuatu bahagian daripada yuran yang diterima sebagaimana yang ditetapkan oleh Menteri dengan jalan peraturan-peraturan yang dibuat di bawah Akta ini.

(2) Segala yuran yang dibayar oleh anggota atau peyuran, menurut aturan-aturan mana-mana pertubuhan berdaftar, dalam masa anggota atau peyuran itu hendak memperoleh kelayakan untuk mendapat faedah-faedah yang diperuntukkan oleh aturan-aturan pertubuhan itu, setelah ditolak jumlah yang tidak lebih daripada peratus yang ditetapkan dan dibenarkan untuk pentadbiran dan lain-lain perbelanjaan, hendaklah dimasukkan ke dalam Bank Simpanan Pejabat Pos atau disimpan sebagai pertaruhan dengan suatu bank daripada *Malaysia Exchange Banks Association* atas nama pertubuhan itu atau dengan persetujuan Pendaftar digunakan bagi memperoleh harta yang tak boleh dialih dan kumpulan-kumpulan wang itu hendaklah menjadi kumpulan-kumpulan wang cadang pertubuhan itu.

(3) Yuran yang diterima daripada anggota atau peyuran pertubuhan berdaftar, yang telah memperoleh kelayakan untuk mendapat faedah-faedah di bawah aturan-aturan pertubuhan itu, setelah ditolak jumlah tidak lebih daripada peratus yang ditetapkan dan dibenarkan untuk pentadbiran dan lain-lain perbelanjaan, hendaklah dimasukkan ke dalam satu kira-kira asing atas nama pertubuhan itu dalam Bank

Simpanan Pejabat Pos atau dalam suatu bank daripada *Malaysia Exchange Banks Association* dan pertubuhan itu boleh mengeluarkan wang daripada kumpulan-kumpulan wang ini bagi maksud membayar faedah-faedah yang diperuntukkan dalam aturan-aturan pertubuhan itu.

(4) Lima puluh peratus daripada kumpulan-kumpulan wang pertubuhan berdaftar yang tidak segera dikehendaki untuk membayar faedah-faedah bolehlah dilaburkan dalam cagaran-cagaran amanah, atau dengan persetujuan Pendaftar atas syarat-syarat sebagaimana yang dikenakannya, bagi membeli tanah.

(5) Tiadalah apa-apa jua pembayaran wang yang kena dibayar akibat kematian seseorang boleh dibuat oleh pertubuhan itu kecuali apabila ditunjukkan surat asal perakuan mati atau suatu salinannya yang diperakui yang dikeluarkan oleh Pendaftar Mati atau, berkenaan dengan seseorang yang mati di luar Persekutuan, surat perakuan mati yang dikeluarkan oleh pihak-berkuasa yang berkenaan di tempat di mana orang itu telah mati:

Dengan syarat bahawa jika sekiranya tiada seseorang yang dinamakan telah dilantik, maka pembayaran bolehlah dibuat kepada wakil diri anggota atau peyuran yang mati itu apabila ditunjukkannya suratkuasa atau pengesahan surat-wasiat anggota atau peyuran yang mati itu.

(6) Bagi maksud seksyen ini *Malaysia Exchange Banks Association* ertinya suatu pertubuhan yang didaftarkan dengan nama itu di bawah Akta ini.

32. Hak, dll. pertubuhan berdaftar tidak tersentuh oleh perubahan nama.

(1) (*Dipotong*).

[Akta A1027]

(2) Jika nama sesuatu pertubuhan berdaftar diubah, maka perubahan itu tidaklah boleh menyentuh hak atau tanggungan pertubuhan berdaftar itu atau hak atau tanggungan mana-mana anggotanya, dan apa-apa pembicaraan di sisi undang-undang bolehlah diteruskan oleh atau terhadap pemegang-pemegang amanah pertubuhan itu atau oleh atau terhadap mana-mana pemegang-jawatan yang boleh mendakwa atau didakwa bagi pihak pertubuhan itu, walaupun ada perubahan nama itu.

[Akta A1027] 33. (Dipotong).

[Akta A1027] 34. (Dipotong).

35. Inspektor-inspektor dan mesyuarat-mesyuarat khas.

(1) Apabila permohonan dibuat oleh satu per sepuluh daripada jumlah anggota-anggota pertubuhan berdaftar atau sekiranya daripada maklumat yang ada dalam miliknya Pendaftar itu berpendapat berfaedah berbuat demikian maka ianya bolehlah—

(a) melantik seorang atau beberapa orang Inspektor bagi memeriksa dan membuat laporan berkenaan dengan hal-hwal pertubuhan itu; atau

(b) memanggil suatu mesyuarat khas pertubuhan itu.

(2) Permohonan yang dibuat oleh anggota-anggota di bawah seksyen ini hendaklah disokong dengan keterangan menunjukkan bahawa pemohon-pemohon itu ada mempunyai sebab-sebab yang cukup bagi menghendaki suatu pemeriksaan dijalankan atau suatu mesyuarat khas dipanggil, dan bahawa mereka tidak didorong oleh tujuan-tujuan jahat dalam permohonan mereka; dan Pendaftar hendaklah menyebabkan supaya suatu notis mengenai permohonan itu diberi kepada pertubuhan berdaftar itu.

(3) Pendaftar boleh, jika difikirkannya patut, menghendaki pemohon-pemohon itu supaya memberi cagaran untuk belanjabelanja untuk pemeriksaan atau mesyuarat khas yang dicadangkan itu sebelum melantik seseorang Inspektor atau sebelum memanggil mesyuarat itu.

(4) Segala perbelanjaan berkenaan atau bersangkutan dengan atau bagi memulakan sesuatu pemeriksaan atau mesyuarat itu hendaklah dibayar oleh anggota-anggota yang membuat permohonan itu atau daripada kumpulan-kumpulan wang pertubuhan itu atau oleh anggota-anggota atau pemegang-pemegang jawatan atau bekas anggota-anggota atau bekas pemegang-pemegang jawatan pertubuhan itu mengikut sesuatu kadar sebagaimana yang diarah oleh Pendaftar.

(5) Seseorang Inspektor yang dilantik di bawah seksyen ini boleh menghendaki supaya segala atau mana-mana buku dan surat-pertubuhan itu ditunjukkan dan boleh memeriksa atas sumpah pemegang-pemegang jawatan, anggota-anggota, ejen dan kakitangannya berhubung dengan urusan pertubuhan itu dan boleh mentadbirkan sumpah itu mengikut semestinya.

(6) Pendaftar boleh mengarahkan bila dan di mana suatu mesyuarat khas di bawah seksyen ini akan diadakan dan apa hal-hal yang hendak dibincang dan diputuskan dalam mesyuarat itu, dan mesyuarat itu hendaklah disifatkan sebagai suatu mesyuarat yang dipanggil mengikut aturan-aturan pertubuhan itu dan mereka-mereka yang hadir dan berhak mengundi adalah berkuasa dalam segala hal melantik Pengerusi, walaupun ada apa-apa aturan pertubuhan itu yang berlawanan.

36. Pembubaran pertubuhan berdaftar.

Sesuatu pertubuhan berdaftar boleh tamat atau dibubarkan dengan apa-apa jalan yang berikut—

- (a) apabila berlaku sesuatu peristiwa yang ditetapkan oleh aturan-aturannya sebagai terjumlah kepada tamatnya pertubuhan itu;
- (b) dengan persetujuan tiga perempat daripada anggota-anggota pertubuhan itu yang dinyatakan dengan tandatangan-tandatangan mereka pada suatu suratcara pembubaran;
- (c) dengan Pendaftar membatalkan pendaftaran pertubuhan itu di bawah seksyen 13 atau membubarkannya di bawah seksyen 37.

37. Suratcara pembubaran.

Jika sesuatu pertubuhan berdaftar ditamatkan dengan suatu suratcara pembubaran, maka peruntukan yang berikut hendaklah dipakai—

- (a) suratcara itu hendaklah menyatakan:
 - (i) tanggungan dan harta pertubuhan berdaftar itu satu per satu;
 - (ii) bilangan anggota-anggota dan peyuran-peyuran dan jenis kepentingan mereka dalam pertubuhan itu; dan
 - (iii) peruntukan dan pembahagian yang dicadangkan mengenai kumpulan-kumpulan wang dan harta pertubuhan itu, melainkan jika peruntukan dan pembahagian itu dinyatakan di dalam suratcara pembubaran sebagai terpulang kepada Pendaftar bagi menetapkannya;
- (b) suatu surat akuan yang dibuat oleh salah seorang daripada pemegang-pemegang amanah atau oleh tiga orang anggota dan setiausaha pertubuhan itu yang peruntukan Akta ini

telah diturut hendaklah dihantarkan kepada Pendaftar bersama dengan suratcara pembubaran itu;

- (c) suratcara itu tidaklah boleh mengarahkan atau mengandungi apa-apa peruntukan berkenaan dengan pembahagian atau peruntukan kumpulan-kumpulan wang pertubuhan itu atau apa-apa bahagian daripadanya kecuali bagi maksud melaksanakan tujuan-tujuan pertubuhan itu sebagaimana yang ditetapkan di dalam aturan-aturannya, melainkan jika tuntutan tiap-tiap orang anggota atau orang yang menuntut bantuan, bayaran tahunan atau lain-lain faedah daripada kumpulan-kumpulan wangnya ditunaikan dengan sempurnanya dahulu atau melainkan jika peruntukan yang cukup ada dibuat berkenaan dengan menunaikan tuntutan-tuntutan itu;
- (d) suratcara pembubaran itu hendaklah didaftarkan mengikut cara yang diperuntukkan di dalam Akta ini berkenaan dengan pendaftaran pindaan-pindaan bagi aturan-aturan, dan hendaklah mengikati semua anggota pertubuhan itu; dan
- (e) Pendaftar hendaklah menyebabkan supaya pembubaran itu disiarkan di dalam *Warta Kerajaan* dan jika dalam masa tiga bulan dari tarikh penyiaran itu di dalam *Warta Kerajaan*, seseorang anggota atau peyuran atau lain-lain orang yang ada mempunyai kepentingan atau yang ada apa-apa tuntutan atas kumpulan-kumpulan wang pertubuhan itu tidak memulakan apa-apa langkah pembicaraan bagi membatalkan pembubaran pertubuhan itu, dan dengan hal yang demikian pembubaran itu tidak dibatalkan, maka pertubuhan itu hendaklah disifatkan sebagai telah dibubarkan dari tarikh penyiaran di dalam *Warta Kerajaan* itu; dan persetujuan-persetujuan yang perlu di dalam suratcara pembubaran itu hendaklah disifatkan sebagai telah didapati dengan sempurnanya dengan tidak payah dibuktikan dengan tandatangan-tandatangan di dalamnya.

38. Pembubaran oleh Pendaftar.

(1) Jika Pendaftar berpendapat daripada apa-apa maklumat di dalam miliknya bahawa kumpulan-kumpulan wang sesuatu pertubuhan berdaftar yang ada mempunyai dua ribu atau lebih anggota-anggota tidak mencukupi untuk menunaikan tuntutan-tuntutan yang ada atasnya itu atau bahawa kadar-kadar carum yang ditetapkan di dalam aturan-aturan pertubuhan itu tidak mencukupi

untuk menunaikan faedah-faedah yang dijanjikan itu, maka Pendaftar boleh memerintah pertubuhan itu melantik seorang juruaudit atau akcuari yang akan diluluskan olehnya bagi menyiasat hal-ehwal atau sebahagian daripada hal-ehwal pertubuhan itu, akan tetapi Pendaftar itu hendaklah memberi tidak kurang daripada sebulan notis terlebih dahulu dengan bertulis kepada pertubuhan yang hal-ehwalnya akan disiasat itu.

(2) Jika apabila penyiasatan dijalankan pendaftar berpendapat bahawa kumpulan-kumpulan wang pertubuhan itu tidak mencukupi untuk menunaikan tuntutan-tuntutan yang ada atasnya atau bahawa kadar-kadar carum yang ditetapkan di dalam aturan-aturan pertubuhan itu tidak mencukupi untuk menunaikan faedah-faedah yang dijanjikan, maka Pendaftar boleh, jika difikirkannya berfaedah berbuat demikian, memerintah supaya pertubuhan itu dibubarkan dan hal-ehwalnya diselesaikan dan hendaklah mengarahkan bagaimana harta pertubuhan itu akan dibahagi-bahagikan atau diperuntukkan:

Dengan syarat bahawa Pendaftar boleh menggantung perintahnya selama tempoh sebagaimana yang difikirkannya perlu bagi membolehkan pertubuhan itu membuat apa-apa perubahan atau penyesuaian mengenai carum-carum dan faedah-faedah yang akan, menurut hematnya, mengelakkan perintah pembubaran daripada perlu dibuat.

(3) Pendaftar yang menjalankan tindakan di bawah seksyen ini adalah diberi segala kuasa dan kebenaran yang boleh dikuatkuasakan dengan hukum-hukum yang sama seperti yang mengenai sesuatu pertikaian yang dirujukkan kepadanya menurut seksyen 40.

(4) Tiap-tiap perintah di bawah seksyen ini, sama ada berkenaan dengan pembubaran atau pembahagian kumpulan-kumpulan wang hendaklah terikat atas pertubuhan yang berkenaan dengannya perintah itu dibuat dan atas semua orang yang ada mempunyai apa-apa tuntutan atas kumpulan-kumpulan wang pertubuhan itu dan hendaklah dikuatkuasakan sama seperti suatu keputusan dalam sesuatu pertikaian di bawah seksyen 40.

(5) Perbelanjaan-perbelanjaan bagi penyiasatan dan bagi menyiarkan perintah berkenaan dengan pembubaran di bawah seksyen ini hendaklah dibayar daripada kumpulan-kumpulan wang pertubuhan itu sebelum apa-apa peruntukan lain dibuat daripadanya.

(6) Tiap-tiap perintah berkenaan dengan pembubaran hendaklah, dalam masa dua puluh satu hari selepas perintah itu dibuat, disiarkan

dalam *Warta Kerajaan* dan jika dalam masa tiga bulan dari penyiaran perintah itu, seseorang anggota atau peyuran atau seseorang yang ada mempunyai apa-apa kepentingan atau apa-apa tuntutan atas kumpulan-kumpulan wang pertubuhan itu tidak memulakan apa-apa langkah-pembicaraan bagi membatalkan pembubaran pertubuhan itu yang disebabkan oleh perintah itu dan oleh demikian itu pembubaran tidak dibatalkan, maka pertubuhan itu hendaklah disifatkan sebagai telah dibubarkan mulai dari tarikh penyiaran perintah itu.

39. Notis mengenai langkah-pembicaraan bagi membatalkan pembubaran.

(1) Jika seseorang menjalankan apa-apa langkah-pembicaraan bagi membatalkan pembubaran sesuatu pertubuhan berdaftar, maka ia hendaklah memberi notis mengenai langkah-pembicaraan itu kepada Pendaftar tidak kurang daripada tujuh hari sebelum langkah-pembicaraan itu dimulakan.

(2) Jika sesuatu perintah dibuat oleh Mahkamah membatalkan pembubaran sesuatu pertubuhan berdaftar, maka pertubuhan itu hendaklah memberi notis mengenai perintah itu kepada Pendaftar dalam masa tujuh hari selepas perintah itu dibuat.

40. Keputusan mengenai pertikaian.

(1) Sesuatu pertikaian di antara—

(a) seseorang anggota atau peyuran atau seseorang yang menuntut melalui seseorang anggota atau seseorang peyuran atau menurut aturan-aturan sesuatu pertubuhan berdaftar dengan pertubuhan itu atau seseorang pemegang-jawatannya; dan

(b) mana-mana orang yang musykil yang tidak lagi menjadi anggota sesuatu pertubuhan berdaftar atau mana-mana orang yang menuntut melalui orang yang musykil itu, atau pertubuhan itu atau seseorang pemegang jawatannya,

hendaklah diputuskan mengikut cara yang diarahkan menurut aturan-aturan pertubuhan berdaftar itu; dan keputusan yang diberi demikian itu hendaklah terikat dan menjadi muktamad atas segala pihak dengan tiada hak merayu, dan tidak boleh dibawa kepada mana-mana Mahkamah atau ditahan dengan jalan *injunction*; dan permohonan untuk penglaksanaannya bolehlah dibuat kepada Mahkamah Seksyen.

(2) Pihak-pihak dalam sesuatu pertikaian yang melibatkan sesuatu pertubuhan berdaftar boleh dengan jalan persetujuan merujukkan pertikaian itu kepada Pendaftar.

(3) Pendaftar yang kepadanya sesuatu pertikaian dirujukkan hendaklah sama ada olehnya sendiri atau oleh seseorang Penolong Pendaftar, membicारा dan memutuskan pertikaian itu dan adalah berkuasa memerintah supaya perbelanjaan-perbelanjaan bagi memutuskan pertikaian itu dibayar sama ada daripada kumpulan-kumpulan wang pertubuhan itu atau oleh mana-mana pihak dalam pertikaian itu sebagaimana yang difikirkannya patut; dan keputusan atau perintahnya adalah berkuatkuasa dan boleh dikuatkuasakan sama seperti suatu keputusan yang dibuat mengikut cara yang diarahkan oleh aturan-aturan pertubuhan itu.

(4) Pendaftar atau Penolong Pendaftar yang kepadanya sesuatu pertikaian dirujukkan boleh mentadbirkannya sumpah-sumpah dan boleh menghendaki supaya segala pihak yang berkenaan dan saksi-saksi hadir, dan supaya segala buku dan surat-an berhubung dengan perkara-perkara yang dipersoal ditunjukkan.

BAHAGIAN 3

PELBAGAI PERUNTUKAN YANG DIPAKAI BAGI PERTUBUHAN-PERTUBUHAN AMNYA

41. Pertubuhan-pertubuhan yang menyalahi undang-undang.

(1) Bagi maksud-maksud Akta ini mana-mana daripada pertubuhan-pertubuhan yang berikut adalah menjadi suatu pertubuhan yang menyalahi undang-undang, iaitu—

- (a) sesuatu pertubuhan atau sesuatu cawangannya yang telah diisytiharkan sebagai menyalahi undang-undang oleh Menteri di bawah seksyen 5;
- (b) sesuatu pertubuhan atau sesuatu cawangannya yang tidak didaftarkan di bawah seksyen 7;
- (c) sesuatu cawangan sesuatu pertubuhan berdaftar, jika cawangan itu telah ditubuhkan melanggar dengan subseksyen (1) seksyen 12, atau terus wujud melanggar dengan proviso kepada subseksyen (3) seksyen 12;
- (d) sesuatu pertubuhan atau sesuatu cawangannya yang pendaftarannya telah dibatalkan di bawah seksyen 2A, 13, 14 atau 16.

(2) Jika sesuatu pertubuhan adalah menyalahi undang-undang di bawah subseksyen (1), atau pendaftarannya dibatalkan di bawah Akta ini, maka tiap-tiap cawangan pertubuhan itu hendaklah dengan serta-merta selepas itu menjadi menyalahi undang-undang dan kelulusan Pendaftar bagi penubuhannya hendaklah disifatkan terbatal, dan jika cawangan sesuatu pertubuhan adalah menyalahi undang-undang di bawah subseksyen (1) atau kelulusan Pendaftar bagi penubuhannya disifatkan terbatal seperti yang disebut terdahulu di bawah subseksyen ini, maka tiap-tiap cawangan yang di bawah cawangan itu hendaklah dengan serta-merta selepas itu menjadi menyalahi undang-undang dan kelulusan Pendaftar bagi penubuhannya hendaklah disifatkan terbatal.

42. Seksaan-seksaan bagi pemegang-jawatan, dsb. pertubuhan yang menyalahi undang-undang.

[Pind. Akta
A1027]

Mana-mana pemegang-jawatan dan mana-mana orang yang mengurus atau menolong dalam pengurusan mana-mana pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada lima tahun atau denda tidak lebih daripada lima belas ribu ringgit atau kedua-duanya.

43. Seksaan-seksaan bagi anggota pertubuhan yang menyalahi undang-undang.

Mana-mana orang yang menjadi atau yang menjalankan kerja sebagai seorang anggota bagi sesuatu pertubuhan yang menyalahi undang-undang atau menghadiri sesuatu mesyuarat pertubuhan yang menyalahi undang-undang itu atau mana-mana orang yang membayar wang atau memberi apa-apa bantuan kepada atau bagi maksud-maksud sesuatu pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada tiga tahun atau denda tidak lebih daripada lima ribu ringgit atau kedua-duanya.

44. Orang-orang yang membenarkan pertubuhan yang menyalahi undang-undang dalam bangunan.

[Pind. Akta
A1027]

Mana-mana orang yang dengan mengetahui membenarkan sesuatu mesyuarat bagi sesuatu pertubuhan yang menyalahi undang-undang atau bagi anggota-anggota sesuatu pertubuhan yang menyalahi undang-undang diadakan di mana-mana rumah, bangunan atau

tempat yang dipunyai atau diduduki olehnya, atau yang ia berkuasa mengawal adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada tiga tahun atau denda tidak lebih sepuluh ribu ringgit atau kedua-duanya.

45. Seksaan kerana menghasut, dsb. seseorang supaya menjadi seorang anggota pertubuhan yang menyalahi undang-undang.

(1) Mana-mana orang yang menghasut, mendorong atau mengajak seorang lain supaya menjadi seorang anggota, atau supaya menolong dalam pengurusan sesuatu pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada empat tahun atau denda tidak lebih daripada lima belas ribu ringgit atau kedua-duanya. [Pind. Akta A1027]

(2) Mana-mana orang yang menggunakan apa-apa kekerasan, ugutan kepada seseorang lain atau menakutkannya bagi mendorongnya supaya menjadi seorang anggota atau supaya menolong dalam pengurusan sesuatu pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada lima tahun atau denda tidak lebih daripada lima belas ribu ringgit atau kedua-duanya. [Pind. Akta A1027]

46. Seksaan kerana mendapatkan yuran atau bantuan untuk pertubuhan yang menyalahi undang-undang.

Mana-mana orang yang mendapatkan atau mencuba mendapatkan daripada seseorang lain apa-apa yuran atau bantuan bagi maksud sesuatu pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada tiga tahun atau denda tidak lebih daripada sepuluh ribu ringgit atau kedua-duanya. [Pind. Akta A1027]

47. Menyiarkan, dsb. dakyah pertubuhan yang menyalahi undang-undang.

Mana-mana orang yang mencetak, menyiarkan, menunjukkan, menjual atau mendedahkan untuk jualan, atau menghantarkan melalui pos atau yang dengan tiada mempunyai kuasa atau sebab yang sah [Pind. Akta A1027]

di sisi undang-undang ada dalam miliknya apa-apa pelekat, akhbar, buku, pekeliling, pernyataan bergambar atau apa-apa jua suratan atau tulisan lain atau yang dikeluarkan atau yang nampaknya dikeluarkan oleh atau bagi pihak atau bagi kepentingan sesuatu pertubuhan yang menyalahi undang-undang adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada dua tahun atau denda tidak lebih daripada lima ribu ringgit atau kedua-duanya dan apa-apa jua buku, majalah, risalah, poster, perisytiharan, akhbar, surat atau apa-apa lain suratan atau tulisan yang berkenaan dengannya orang itu telah disabitkan hendaklah dirampas.

48. Bertindak bagi pihak atau mewakili suatu pertubuhan yang menyalahi undang-undang.

[Pind. Akta
A1027]

(1) Mana-mana orang yang dengan apa-apa jua cara bertindak bagi pihak, atau mewakili, atau membantu, sama ada atas sifat profesional atau dengan cara apa jua pun selainnya, mana-mana pertubuhan yang menyalahi undang-undang, atau mana-mana orang yang telah menjadi pemegang jawatannya seolah-olah dia terus menjadi pemegang jawatannya, atau mana-mana badan yang telah menjadi badan pengelola pertubuhan itu atau mana-mana cawangannya seolah-olah ia terus menjadi badan pengelola yang sedemikian, berhubungan dengan apa-apa perkara adalah melakukan suatu kesalahan dan, apabila disabitkan, boleh dikenakan penjara selama tempoh tidak lebih daripada lima tahun atau denda tidak lebih daripada lima belas ribu ringgit atau kedua-duanya.

(2) Subseksyen (1) tidak terpakai bagi sesuatu rayuan oleh pertubuhan yang menyalahi undang-undang di bawah seksyen 18, atau bagi apa-apa prosiding dalam mana-mana mahkamah berkenaan dengan apa-apa perkara yang melibatkan pertubuhan itu, atau mana-mana orang yang telah menjadi pemegang jawatannya, atau suatu badan yang telah menjadi badan pengelolanya atau badan pengelola mana-mana cawangannya.

[Pind. Akta
A1027]

49. Liabiliti orang yang memegang jawatan dalam sesuatu pertubuhan yang pendaftarannya telah dibatalkan.

(1) Jika pendaftaran mana-mana pertubuhan, selain daripada suatu pertubuhan yang adalah suatu parti politik, telah dibatalkan di bawah seksyen 2A atau perenggan (b) atau sub-perenggan (i), (ii),

(iii), (iv), (vi), (vii), (viii) atau (ix) perenggan (c) subseksyen (1) seksyen 13, atau di bawah seksyen 16, mana-mana orang yang memegang jawatan dalam pertubuhan itu pada bila-bila masa selepas masa pembatalan itu menjadi, atau selepas tamat tempoh tiga puluh hari daripada pembatalan itu masih terus menjadi seseorang yang memegang jawatan dalam mana-mana pertubuhan yang lain tanpa kebenaran bertulis Pendaftar adalah bersalah atas suatu kesalahan dan hendaklah dikenakan, apabila disabitkan, penjara bagi tempoh tidak melebihi lima tahun atau denda tidak melebihi lima belas ribu ringgit atau kedua-duanya.

(2) Kecuali jika pendaftaran sesuatu pertubuhan telah dibatalkan di bawah seksyen 2A atau perenggan (b) seksyen-kecil (1) seksyen 13 sekatan yang dikenakan ke atas seseorang pemegang jawatan di bawah seksyen-kecil (1) hendaklah terhenti selepas tamat tempoh lima tahun yang bermula dari tarikh pembatalan itu. [Mas. Akta
A1027]

50. Bendera, lambang, lencana atau lain-lain tanda bagi pertubuhan-pertubuhan.

(1) Tiadalah sesuatu jua pertubuhan boleh memakai sebagai untuknya sendiri apa-apa bendera, lambang, lencana atau lain-lain tanda melainkan jika bendera, lambang, lencana atau lain-lain tanda itu telah diluluskan oleh Pendaftar.

(2) Pendaftar boleh menyatakan syarat-syarat yang boleh membenarkan bendera, lambang, lencana atau lain-lain tanda itu ditunjukkan.

(3) Mana-mana orang atau pertubuhan yang menunjukkan apa-apa bendera, lambang, lencana atau lain-lain tanda yang tiada mendapat kelulusan oleh Pendaftar atau dengan melanggar mana-mana syarat yang dikenakan oleh Pendaftar adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada tiga bulan atau denda tidak lebih daripada tiga ribu ringgit. [Pind. Akta
A1027]

51. Tanggungan pemegang jawatan berkenaan dengan kesalahan-kesalahan oleh pertubuhan.

(1) Jika sesuatu kesalahan yang boleh diseksa dengan denda atau penjara telah dilakukan, sama ada seseorang telah disabitkan berkenaan dengannya atau tidak, dan kesalahan itu telah dilakukan atau berupa telah dilakukan atas nama atau bagi pihak mana-mana pertubuhan, maka tiap-tiap pemegang jawatan pertubuhan itu dan

tiap-tiap orang yang mengurus atau menolong dalam pengurusan pertubuhan itu pada masa kesalahan itu dilakukan hendaklah disifatkan sebagai melakukan kesalahan itu dan bolehlah dikenakan seksaan yang ditetapkan oleh undang-undang baginya, melainkan jika ia menunjukkan hingga memberi puashati kepada Mahkamah bahawa kesalahan itu telah dilakukan dengan tiada pengetahuannya dan bahawa ia telah menjalankan segala usaha yang sepatutnya bagi mengelakkan kesalahan itu daripada dilakukan.

(2) Mana-mana pemegang jawatan atau orang yang mengurus atau menolong dalam pengurusan pertubuhan itu bolehlah didakwa di bawah seksyen ini walaupun boleh jadi ia tidak mengambil bahagian dalam melakukan kesalahan itu.

(3) Dalam apa-apa pendakwaan di bawah seksyen-kecil (1) terhadap seseorang pemegang jawatan atau mana-mana orang yang mengurus atau yang menolong dalam pengurusan sesuatu pertubuhan, apa-apa surat yang didapati dalam milik seseorang pemegang jawatan pertubuhan itu atau dalam milik seseorang yang menolong dalam pengurusan pertubuhan itu atau dalam milik seseorang anggota pertubuhan itu atau yang didapati di dalam mana-mana tempat yang dipajak, disewa, dipinjam, digunakan atau dikelolai oleh pertubuhan itu hendaklah menjadi keterangan *prima facie* mengenai kandungannya bagi maksud membuktikan bahawa sesuatu telah dilakukan atau berupa telah dilakukan oleh atau bagi pihak pertubuhan itu.

52. Pertubuhan yang menggunakan upacara *Triad* disifatkan sebagai pertubuhan yang menyalahi undang-undang.

(1) Tiap-tiap pertubuhan, sama ada ianya didaftarkan atau tidak, yang menggunakan upacara *Triad*, hendaklah disifatkan sebagai suatu pertubuhan yang menyalahi undang-undang.

(2) Bagi maksud seksyen-kecil (1) upacara *Triad* ertinya apa-apa upacara yang biasanya digunakan oleh Pertubuhan-pertubuhan *Triad*, apa-apa upacara yang sehampir-hampir menyerupai sesuatu upacara itu dan sesuatu bahagian daripada upacara itu.

(3) Mana-mana orang yang menjadi atau menjalankan kerja sebagai seorang anggota sesuatu pertubuhan *Triad* atau yang menghadiri sesuatu mesyuaratnya atau yang didapati ada dalam miliknya, atau ada dalam jagaan atau kawalannya apa-apa buku, kira-kira, tulisan, senarai anggota-anggota meteri, panji-panji atau tanda bagi, atau berhubung dengan, sesuatu pertubuhan *Triad* sama

ada pertubuhan itu ditubuhkan di dalam Persekutuan atau tidak, adalah melakukan suatu kesalahan dan, apabila disabitkan, bolehlah dikenakan penjara selama tempoh tidak lebih daripada lima tahun atau denda tidak lebih daripada lima belas ribu ringgit.

53. Seksaan kerana menggunakan secara salah wang atau harta pertubuhan berdaftar.

(1) Jika, atas aduan yang dibuat oleh seseorang anggota sesuatu pertubuhan berdaftar, atau oleh Pendaftar diberitahu hingga memberi puashati Mahkamah Sesyen bahawa seseorang pemegang jawatan atau anggota pertubuhan itu ada dalam milik atau kawalannya apa-apa jua harta pertubuhan itu dengan apa-apa jalan, lain daripada yang mengikut aturan-aturan pertubuhan itu, atau telah menahan secara yang menyalahi undang-undang atau telah bersengaja menggunakan apa-apa wang pertubuhan itu bagi maksud-maksud, lain daripada maksud-maksud yang dinyatakan atau diarahkan dalam aturan-aturan pertubuhan itu dan yang dibenarkan oleh Akta ini, maka Mahkamah itu hendaklah, jika difikirkannya perlu untuk keadilan hal itu, memerintah pemegang jawatan atau anggota itu supaya menyerahkan segala harta itu kepada pemegang-pemegang amanah pertubuhan itu serta membayar kepada mereka itu wang yang ditahan secara menyalahi undang-undang atau yang digunakan secara tidak sebetulnya itu.

(2) Sesuatu aduan yang dibuat di bawah seksyen-kecil (1), lain daripada aduan yang dibuat oleh Pendaftar, tidaklah boleh dilayani melainkan jika Mahkamah itu puashati bahawa pengadu itu adalah, pada tarikh aduan itu, seseorang anggota bagi pertubuhan berdaftar yang berkenaan dengan hartanya aduan itu dibuat.

(3) Mana-mana orang yang terikat oleh sesuatu perintah yang dibuat di bawah seksyen-kecil (1) yang tidak menurut syarat-syaratnya dan arahan-arahan yang diberi di dalamnya dalam masa yang dinyatakan dalam perintah itu adalah melakukan suatu kesalahan dan, apabila disabitkan, bolehlah dikenakan denda tidak lebih daripada lima ribu ringgit. [Pind. Akta
A1027]

(4) Sesuatu perintah yang dibuat di bawah seksyen-kecil (1) tidaklah menyentuh atau menahan sesuatu pendakwaan atau pembicaraan sivil terhadap mana-mana pemegang jawatan atau anggota itu.

[Mas. Akta
A1027]

53A. Penalti kerana menunjukkan atau menggunakan perakuan pendaftaran yang dibatalkan.

Mana-mana orang yang menunjukkan atau menggunakan mana-mana perakuan pendaftaran atau salinan perakuan pendaftaran sesuatu pertubuhan yang pendaftarannya telah dibatalkan dengan mengetahui bahawa perakuan pendaftaran itu telah dibatalkan adalah melakukan suatu kesalahan dan apabila disabitkan, boleh dikenakan denda tidak lebih daripada dua ribu ringgit.

54. Seksaan bagi tipuan, akuan palsu dan salah-guna.

Mana-mana orang yang memberi, dengan niat hendak mengeliru atau menipu, kepada mana-mana orang suatu salinan sesuatu aturan-aturan, undang-undang, peraturan-peraturan atau lain-lain suratan, lain daripada aturan-aturan sesuatu pertubuhan berdaftar, supaya dipercayai bahawa ianya adalah aturan-aturan pertubuhan itu yang ada dipakai pada masa itu atau bahawa tidak ada aturan-aturan lain bagi pertubuhan itu atau memberi kepada mana-mana orang suatu salinan sesuatu aturan-aturan supaya dipercayai bahawa aturan-aturan itu adalah sesuatu pertubuhan berdaftar pada hal pertubuhan itu tidak berdaftar, adalah melakukan suatu kesalahan dan, apabila disabitkan, bolehlah dikenakan denda tidak lebih daripada dua ribu ringgit atau penjara selama tempoh tidak lebih daripada enam bulan atau denda dan penjara kedua-duanya sekali.

[Pind. Akta
A1027]

54A. Penalti kerana memberikan maklumat palsu.

Mana-mana orang yang memberi Pendaftar, atau seseorang Penolong Pendaftar, apa-apa maklumat atau dokumen yang dikehendaki di bawah Akta ini atau peraturan-peraturan yang dibuat di bawahnya yang dia sama ada mengetahui atau ada sebab untuk mempercayai adalah palsu adalah melakukan suatu kesalahan dan, apabila disabitkan, boleh dikenakan denda tidak lebih daripada dua ribu ringgit.

[Mas. Akta
A1027]

55. Anggapan.

Dalam apa-apa pembicaraan di bawah Akta ini—

- (a) jika dibuktikan bahawa sesuatu kelab, syarikat, perkongsian atau persatuan adalah wujud, maka hendaklah dianggap bahawa kelab, syarikat, perkongsian atau persatuan itu adalah suatu pertubuhan dalam erti Akta ini melainkan jika akasnya dibuktikan;

- (b) maka tidaklah perlu bagi pihak pendakwa membuktikan bahawa sesuatu pertubuhan mempunyai sesuatu nama atau bahawa ianya telah ditubuhkan atau adalah biasanya dikenali dengan sesuatu nama yang tertentu;
- (c) jika sekiranya dituduh bahawa sesuatu pertubuhan adalah suatu pertubuhan yang menyalahi undang-undang maka tanggungan bagi membuktikan yang ianya adalah suatu pertubuhan berdaftar, atau yang ianya bukannya suatu pertubuhan tempatan, hendaklah terletak ke atas orang yang dipertuduhkan itu.

56. Dianggap menjadi anggota, dsb., pertubuhan.

(1) Jika apa-apa buku, kira-kira, tulisan, senarai anggota-anggota, meteri, panji-panji atau tanda bagi, atau berhubung dengan, atau yang berupa berhubung dengan sesuatu pertubuhan didapati ada di dalam milik, jagaan atau di bawah kawalan mana-mana orang, maka hendaklah dianggap, sehingga akasnya dibuktikan, bahawa orang itu adalah seorang anggota pertubuhan itu dan pertubuhan itu hendaklah dianggap, sehingga akasnya dibuktikan, sebagai telah ada wujud pada masa buku, kira-kira, tulisan, senarai anggota-anggota, meteri, panji-panji atau tanda itu didapati demikian itu.

(2) Jika apa-apa buku, kira-kira, tulisan, senarai anggota-anggota, meteri, panji-panji atau tanda bagi, atau berhubung dengan, sesuatu pertubuhan didapati—

- (a) ada di dalam milik, jagaan atau di bawah kawalan mana-mana orang, maka hendaklah dianggap, sehingga akasnya dibuktikan, bahawa orang itu adalah menolong dalam pengurusan pertubuhan itu;
- (b) tersembunyi dalam mana-mana bangunan, maka hendaklah dianggap sehingga akasnya dibuktikan, bahawa yang tersebut itu ada di dalam milik penduduk bangunan itu.

(3) Apabila Mahkamah berpendapat bahawa ada sebab-sebab yang munasabah bagi mengsyaki bahawa sesuatu tempat yang dimasuki atau digeledah menurut sesuatu kuasa yang sah di sisi undang-undang di bawah atau yang diberi oleh Akta ini telah, sejurus sebelum atau pada masa kemasukan itu, digunakan oleh atau bagi maksud-maksud sesuatu pertubuhan yang menyalahi undang-undang, maka mana-mana orang yang dijumpai di tempat yang tersebut itu pada bila-bila jua dalam masa penggeledahan itu atau

yang didapati meninggalkan tempat itu sejurus sebelum atau pada masa kemasukan itu hendaklah, melainkan jika ia menerangkan dengan memberi puashati sebab-sebabnya ia berada di tempat yang tersebut itu, dianggap sebagai seorang anggota pertubuhan yang menyalahi undang-undang.

57. Keterangan.

(1) Dalam apa-apa pendakwaan di bawah Akta ini, maka tidaklah boleh menjadi apa-apa bantahan terhadap kemasukan keterangan pakar atas alasan bahawa pakar itu bukannya atau tidak pernah menjadi seorang anggota bagi mana-mana pertubuhan yang menyalahi undang-undang.

(2) Dalam apa-apa pendakwaan di bawah Akta ini, Mahkamah boleh melihat, bagi maksud-maksud keterangan, mana-mana jua daripada buku-buku yang berikut—

Thian Ti Hwui, the Hung-League or Heaven-Earth League, by G. Schlegel;

The Triad Society, by W. Stanton;

The Hung Society or the Society of Heaven and Earth, by J.S.M. Ward and W.G. Stirling;

Triad Societies in Hong Kong, by W.P. Morgan,

dan lain-lain buku atau karangan yang diterbitkan atas perkara pertubuhan-pertubuhan pada amnya yang menyalahi undang-undang atau pertubuhan-pertubuhan tertentu yang menyalahi undang-undang, yang difikirkan oleh Mahkamah sebagai petua atas perkara yang terkandung di dalamnya.

58. Perlindungan bagi pemberi rahsia.

Kecuali sebagaimana yang diperuntukkan kemudian daripada ini—

- (a) tiadalah seseorang jua saksi terpaksa atau boleh dibenar menyatakan nama dan alamat seseorang pemberi rahsia di bawah Akta ini ataupun menyatakan apa-apa hal yang mungkin membawa kepada pemberi rahsia itu diketahui; dan
- (b) jika apa-apa buku, surat, atau kertas yang menjadi keterangan atau yang boleh diperiksa dalam apa-apa jua pembicaraan sivil atau jenayah di bawah Akta ini mengandungi apa-apa catitan yang ada memberi nama atau

sifat-sifat seseorang pemberi rahsia atau yang mungkin membawa kepadanya diketahui, maka Mahkamah atau Majistret hendaklah menyebabkan supaya segala catitan itu ditutup supaya tidak dapat dilihat atau dipadamkan hanya setakat mana yang perlu untuk memperlindungi pemberi rahsia itu daripada dapat diketahui.

Dengan syarat bahawa jika dalam mana-mana pembicaraan jenayah di bawah Akta ini Mahkamah adalah puashati, setelah siasatan dijalankan sepenuhnya berkenaan hal itu, bahawa menguatkuasakan dengan sepenuhnya peruntukan-peruntukan seksyen ini mungkin menyebabkan keadilan terpesong, maka Mahkamah bolehlah menghendaki supaya maklumat yang asal ditunjukkan dan boleh membenarkan siasatan dan boleh menghendaki supaya segala hal dikatakan kepada Mahkamah berkenaan dengan pemberi rahsia itu.

59. Perampasan.

Apa-apa buku, kira-kira, tulisan, panji-panji, tanda atau lain-lain harta yang dipunyai oleh mana-mana pertubuhan yang menyalahi undang-undang hendaklah, atas perintah Yang di-Pertua Mahkamah Sesyen atau seseorang Majistret, dirampas dan diberikan kepada Pendaftar atau kepada seorang Penolong Pendaftar untuk apa-apa jua yang difikirkannya patut dibuat ke atasnya.

60. Kesalahan-kesalahan yang tidak boleh dijamin dan yang kena didaftarkan.

Tiap-tiap kesalahan terhadap peruntukan-peruntukan seksyen 9A dan 13A, seksyen 42 hingga 49, termasuk kedua-dua seksyen itu, dan seksyen 52 hendaklah disifatkan sebagai yang boleh ditangkap dan yang tidak boleh dijamin di bawah undang-undang berhubung dengan peraturan jenayah dan hendaklah juga disifatkan sebagai yang kena didaftarkan di bawah undang-undang berhubung dengan pendaftaran penjenayah-penjenayah. [Pind. Akta
A1027]

61. Persetujuan untuk mendakwa.

(1) Kecuali mengenai orang-orang yang dipertuduhkan di bawah peruntukan-peruntukan seksyen 13A, 45 dan 52 dan orang-orang yang ditangkap di bawah peruntukan-peruntukan seksyen 65 dan seksyen-kecil (5) dalam seksyen 66 dalam Akta ini, sesuatu [Pind. Akta
A1027]

pendakwaan di bawah Akta ini tidak boleh dibawa kecuali oleh atau dengan persetujuan Pendakwa Raya:

Dengan syarat bahawa seseorang yang dipertuduhkan atas sesuatu kesalahan itu bolehlah ditangkap, atau waran untuk menangkapnya bolehlah dikeluarkan dan dilaksanakan, dan mana-mana orang yang tersebut itu bolehlah ditahan dalam jagaan atau dibenarkan jamin, walaupun persetujuan Pendakwa Raya untuk membawa pendakwaan atas kesalahan itu belum didapati, tetapi hal itu tidak boleh didakwa selanjutnya sehingga persetujuan itu telah didapati.

(2) Apabila seseorang dibawa ke hadapan Mahkamah di bawah seksyen ini sebelum Pendakwa Raya memberi persetujuan kepada pendakwaan itu, pertuduhan itu hendaklah dihuraikan kepada orang itu tetapi ia tidak boleh diminta membuat apa-apaakuan dan peruntukan undang-undang yang pada masa itu berkuatkuasa berhubung dengan peraturan jenayah hendaklah terubah demikian itu.

62. Menyampaikan saman.

Tiap-tiap saman, notis atau lain-lain surat yang dikeluarkan di bawah Akta ini, atau di bawah peraturan-peraturan yang dibuat di bawah ini, hendaklah disifatkan telah disampaikan dengan sah dan sepenuhnya, jika disampaikan atau ditinggalkan kepada orang yang dimaksud hendak disampaikan itu atau, sekiranya tidak dapat dijumpai, jika ditinggalkan di tempat urusan atau tempat tinggalnya yang akhir diketahui, oleh mana-mana orang yang diberi kuasa bagi maksud itu oleh Pendaftar atau, dalam hal penyampaian sesuatu notis atau perintah kepada pertubuhan, dengan jalan menghantar notis atau perintah itu dengan pos berdaftar kepada alamat berdaftar pertubuhan itu.

63. Kuasa masuk dan memeriksa rekod.

Pendaftar, seorang Penolong Pendaftar atau seorang Pegawai Pendaftaran boleh, jika dia mempunyai sebab bagi mempercayai bahawa mana-mana pertubuhan ada menjalankan aktiviti yang melanggar dengan mana-mana peruntukan Akta ini atau mana-mana peraturan yang dibuat di bawahnya atau mana-mana daripada kaedah-kaedahnya, dan selepas memberi notis kepada mana-mana pemegang jawatan, memasuki mana-mana tempat yang dia mempunyai sebab bagi mempercayai diselenggarakan atau digunakan oleh mana-mana pertubuhan berdaftar atau mana-mana anggotanya sebagai suatu tempat mesyuarat atau tempat urusan, dan boleh menggeledah tempat itu dan memeriksa semua buku, akaun, minit

mesyuarat dan dokumen-dokumen lain yang disimpan oleh pertubuhan itu.

64. Kuasa untuk masuk, menggeledah dan menyita oleh Pendaftar atau Penolong Pendaftar dalam hal-hal khas.

(1) Pendaftar atau seseorang Penolong Pendaftar, atau mana-mana pegawai lain yang dilantik di bawah seksyen-kecil (1A) seksyen 3 dan diberi kuasa dengan sepenuhnya secara bertulis oleh Pendaftar atau Penolong Pendaftar, yang ada sebab mempercayai bahawa mana-mana pertubuhan berdaftar adalah digunakan bagi maksud-maksud yang memudaratkan keamanan awam, kebajikan, ketenteraman atau akhlak di dalam Persekutuan, boleh memasuki, sama ada dengan pertolongan atau tidak, dan dengan menggunakan kekerasan bagi maksud itu, jika perlu, mana-mana tempat yang ia ada sebab mempercayai adalah digunakan sebagai tempat mesyuarat atau tempat urusan bagi pertubuhan itu, dan boleh memeriksa tempat itu dan mana-mana orang yang dijumpai di dalamnya atau didapati lari daripada tempat itu untuk mendapat keterangan bahawa pertubuhan itu adalah digunakan bagi sesuatu maksud sebagaimana yang tersebut di atas.

[Pind. Akta
A1027]

(2) Pendaftar, atau seseorang Penolong Pendaftar, atau mana-mana pegawai lain, yang memasuki mana-mana tempat di bawah seksyen-kecil (1) boleh menyita dan menahan apa-apa buku, kira-kira, tulisan, senarai anggota, panji-panji, meterai, tanda, lambang atau barang lain yang dipunyai oleh pertubuhan berdaftar itu yang dia ada sebab untuk percaya mungkin dikehendaki berkenaan dengan prosiding selanjutnya di bawah Akta ini.

[Mas. Akta
A1027]

65. Kuasa memasuki dan menggeledah.

(1) Mana-mana pegawai polis yang berpangkat Inspektor atau atas daripada itu boleh, sama ada dengan pertolongan atau tidak dengan menggunakan kekerasan, jika perlu, memasuki mana-mana rumah kediaman atau lain-lain bangunan, atau mana-mana tempat yang di dalamnya, ia ada sebab mempercayai bahawa suatu mesyuarat bagi sesuatu pertubuhan yang menyalahi undang-undang, atau bagi orang-orang yang menjadi anggota sesuatu pertubuhan yang menyalahi undang-undang, sedang diadakan, atau bahawa apa-apa buku, kira-kira, tulisan, senarai anggota-anggota, panji-panji, meteri, tanda, senjata atau lain-lain barang yang dipunyai oleh mana-mana pertubuhan yang menyalahi undang-undang ada disembunyikan, disimpan atau diletakkan, dan menangkap atau menyebabkan supaya ditangkap semua orang yang dijumpai di

dalam rumah itu dan menggeledah rumah, bangunan atau tempat itu, serta mengambil atau menyebabkan supaya diambil segala buku, kira-kira, tulisan, panji-panji, senarai anggota-anggota, meteri, tanda, senjata dan lain-lain barang yang ia ada sebab yang munasabah bagi mempercayai dipunyai oleh mana-mana pertubuhan yang menyalahi undang-undang atau sebagai berhubung dengan apa-apa jalan jua dengannya.

(2) Semua orang yang ditangkap demikian itu dan segala barang yang diambil demikian itu boleh ditahan dalam jagaan dan dibawa ke hadapan Majistret untuk diambil tindakan mengikut undang-undang.

66. Kuasa Pendaftar atau Penolong Pendaftar bagi menyaman supaya hadir.

(1) Pendaftar atau seseorang Penolong Pendaftar boleh menyaman supaya hadir di hadapannya mana-mana orang yang ia ada sebab mempercayai boleh memberi apa-apa maklumat tentang wujudnya atau perjalanan sesuatu pertubuhan yang menyalahi undang-undang, atau pertubuhan yang disyaki menyalahi undang-undang, atau perjalanan sesuatu pertubuhan berdaftar.

(2) Orang yang disaman supaya hadir itu hendaklah hadir pada waktu dan tempat yang dinyatakan di dalam saman itu dan menunjukkan segala suratan dalam jagaan, milik atau kuasanya berhubung dengan pertubuhan itu atau pertubuhan yang disyaki itu, dan menjawab dengan benarnya segala soal yang ditanya kepadanya oleh Pendaftar atau seseorang Penolong Pendaftar.

(3) Pendaftar dan tiap-tiap Penolong Pendaftar boleh mentadbirkan sumpah kepada dan memeriksa atas sumpah mana-mana orang yang disaman supaya hadir di hadapannya di bawah seksyen ini.

(4) Jika mana-mana orang yang disaman supaya hadir oleh Pendaftar atau seseorang Penolong Pendaftar di bawah seksyen ini tidak menurut, dengan tiada apa-apa sebab yang sah di sisi undang-undang, apa-apa kewajipan yang ditanggungkan ke atasnya menurut seksyen-kecil (2) ataupun memberi maklumat yang Pendaftar atau Penolong Pendaftar itu percaya sebagai palsu, maka Pendaftar atau Penolong Pendaftar itu, boleh, jika difikirkannya berfaedah untuk mengenal orang itu pada masa hadapan, mengeluarkan perintah supaya gambar dan cap jari orang itu diambil pada suatu masa dan tempat dan mengikut cara sebagaimana yang difikirkan patut oleh Pendaftar atau Penolong Pendaftar itu. Pendaftar itu boleh membuat

apa-apa menurut budibicaranya yang mutlak, sebagaimana yang difikirkannya patut kepada gambar dan cap jari itu.

(5) Mana-mana orang yang tidak menurut perintah itu atau yang menghalang perintah itu diturut boleh ditangkap dan ditahan dalam jagaan dan, apabila disabitkan, bolehlah dikenakan denda tidak lebih daripada seribu ringgit. [Pind. Akta A1027]

(6) Tiadalah apa-apa jua kenyataan yang dibuat oleh seseorang yang disaman supaya hadir di hadapan Pendaftar atau seseorang Penolong Pendaftar di bawah peruntukan seksyen ini boleh mengenakan ia ditangkap atau pendakwaan jenayah dijalankan ke atasnya, ataupun dijadikan bukti terhadapnya dalam apa-apa pembicaraan jenayah, kecuali dalam sesuatu pendakwaan kerana tidak memberi jawapan yang sebenarnya di bawah seksyen ini.

67. Peraturan-peraturan.

(1) Menteri boleh membuat peraturan-peraturan bagi maksud menguatkuasakan peruntukan-peruntukan Akta ini.

(2) Khususnya dan dengan tidak menyentuh keluasan kuasa-kuasa yang diberi oleh seksyen-kecil (1), Menteri boleh membuat peraturan untuk atau berkenaan dengan segala atau mana-mana jua daripada hal-hal yang berikut—

- (a) menetapkan cara pendaftaran bagi pertubuhan-pertubuhan di bawah Akta ini;
- (b) melarang penggunaan, oleh pertubuhan-pertubuhan berdaftar, lencana-lencana dan tanda-tanda yang menyalahi undang-undang atau yang tidak diingini;
- (c) menetapkan borang-borang yang boleh digunakan untuk menjalankan peruntukan-peruntukan Akta ini;
- (d) menetapkan maklumat yang kena diberikan kepada Pendaftar;
- (e) menetapkan bayaran yang boleh dipungut di bawah Akta ini;
- (f) menetapkan apa-apa jua yang boleh ditetapkan di bawah Akta ini;
- (g) menetapkan peratus daripada jumlah yuran atau apa-apa pendapatan lain yang diterima yang boleh dipotong oleh sesuatu pertubuhan faedah bersama untuk pentadbiran dan lain-lain perbelanjaan.

(3) Mana-mana peraturan yang tersebut itu boleh mengadakan peruntukan bahawa pelanggaran mana-mana peraturan adalah suatu kesalahan terhadap peraturan itu dan boleh mengadakan peruntukan seksaan untuk mana-mana kesalahan itu, dengan suatu denda yang tidak lebih daripada dua ribu ringgit dan dengan suatu tempoh penjara yang tidak lebih daripada enam bulan.

68. Pemansuhan.

(1) Ordinan Pertubuhan, 1949 bagi Negeri-negeri Tanah Melayu, Ordinan Pertubuhan, 1957 bagi Sarawak dan Ordinan Pertubuhan, 1961 bagi Sabah adalah dimansuhkan:

Dengan syarat bahawa mana-mana pertubuhan, lain daripada sesuatu pertubuhan faedah bersama, jika telah didaftarkan atau dikecualikan daripada pendaftaran di bawah peruntukan-peruntukan Ordinan yang dengan ini dimansuhkan itu hendaklah, tertakluk kepada seksyen-kecil (2), disifatkan sebagai pertubuhan berdaftar di bawah peruntukan Akta ini.

(2) Mana-mana pertubuhan, lain daripada sesuatu pertubuhan faedah bersama, yang didaftarkan atau dikecualikan daripada pendaftaran menurut peruntukan Ordinan-ordinan yang tersebut dalam seksyen-kecil (1), hendaklah dalam tempoh enam bulan daripada tarikh berkuatkuasanya Akta ini atau daripada apa-apa tempoh yang dilanjutkan, yang tidak lebih daripada tiga bulan, sebagaimana yang dibenarkan oleh Pendaftar, mengubah perlembagaan atau aturan-aturannya supaya mengandungi peruntukan untuk segala perkara yang diterangkan dalam Jadual 1 kepada Akta ini.

69. Peruntukan peralihan yang dipakai bagi pertubuhan faedah bersama.

(1) Walaupun Ordinan-ordinan yang tersebut dalam seksyen yang akhir di atas mansuhkan, tiap-tiap pertubuhan faedah bersama yang didaftarkan di bawah mana-mana jua daripada Ordinan-ordinan yang tersebut itu hendaklah, dalam tempoh sembilan puluh hari selepas tarikh berkuatkuasanya Akta ini, disifatkan sebagai didaftarkan di bawah Akta ini dan hendaklah dalam tempoh yang tersebut di atas itu membuat permohonan kepada Pendaftar untuk pendaftaran di bawah seksyen 6 dan 7 mengikut cara yang diperuntukkan di bawah seksyen-kecil (2) di bawah ini; dan tiadalah sesuatu pertubuhan faedah bersama yang tersebut itu boleh

didaftarkan melainkan jika Pendaftar puashati bahawa ianya adalah menurut peruntukan-peruntukan Akta ini.

(2) Permohonan untuk pendaftaran yang tersebut dalam seksyen-kecil (1) di atas hendaklah disertakan dengan suatu kenyataan am mengenai harta dan tanggungan bagi pertubuhan faedah bersama itu, yang dibuat mengikut bentuk dan mengandungi apa-apa butir sebagaimana yang dikehendaki oleh Pendaftar dan, sekiranya dikehendaki oleh Pendaftar, disertakan dengan suatu salinan aturan-aturan pertubuhan faedah bersama itu. Permohonan itu tidaklah dikenakan apa-apa bayaran.

(3) Sekiranya sesuatu pertubuhan faedah bersama yang didaftarkan di bawah mana-mana jua daripada Ordinan-ordinan yang dimansuhkan oleh seksyen akhir di atas tidak membuat permohonan untuk pendaftaran menurut peruntukan seksyen-kecil (1) di atas atau tidak menurut peruntukan Akta ini dalam masa sembilan puluh hari yang tersebut di atas itu, maka pertubuhan itu hendaklah disifatkan apabila habis sahaja tempoh itu sebagai dibubarkan, dan kumpulan-kumpulan wangnya hendaklah dilepaskan mengikut aturan-aturan pertubuhan faedah bersama itu (jika ada) atau jika tiada apa-apa aturan yang boleh dipakai bagi hal itu, maka kumpulan-kumpulan wang itu hendaklah dibahagi-bahagikan mengikut kadar jumlah carum yang dibayar oleh tiap-tiap anggota.

70. Kuasa bagi mengecualikan.

Menteri boleh, menurut budibicaranya, dengan bertulis mengecualikan mana-mana pertubuhan yang didaftarkan di bawah Akta ini daripada segala atau mana-mana jua daripada peruntukan-peruntukan Akta ini.

JADUAL 1
(Seksyen 7 (3) (f))

PERLEMBAGAAN DAN ATURAN-ATURAN PERTUBUHAN-PERTUBUHAN

1. Perkara-perkara yang peruntukan baginya dikehendaki dibuat dalam perlembagaan atau aturan-aturan bagi tiap-tiap pertubuhan tempatan atau cawangannya ialah seperti berikut—

[Pind. Akta
A1027]

- (a) nama dan tempat urusan berdaftar atau alamat pos berdaftar bagi pertubuhan;
- (b) *(Dimansuhkan oleh Akta A557)*;
- (c) butir-butir yang betul mengenai sifat rekabentuk dan warna apa-apa bendera, lambang, lencana atau lain-lain tanda yang digunakan oleh pertubuhan;
- (d) maksud-maksud atau tujuan-tujuan yang kerananya pertubuhan ditubuhkan, atau yang ia berusaha hendak mencapai, atau yang kerananya kumpulan-kumpulan wangnya atau mana-mana daripadanya boleh digunakan;
- (e) kelayakan-kelayakan keanggotaan, termasuk butir-butir mengenai apa-apa sekatan atau batasan yang boleh dikenakan tentang bilangan, had umur, jantina, ugama, bangsa, tempat tinggal, suku bangsa atau nama baka bagi orang-orang yang boleh dibenarkan menjadi anggota pertubuhan;
- (f) kaedah perlantikan atau pemilihan bagi anggota;
- (g) penubuhan dan kaedah perlantikan jawatankuasa atau badan pengelola dan jawatan-jawatan, kuasa-kuasa dan kerja-kerja pemegang-pemegang jawatan bagi pertubuhan dan cawangannya jika ada;
- (gg) bahawa, jika Pendaftar hendak, pemegang jawatan bagi pertubuhan dan tiap pegawai yang menjalankan kerja tadbiran di dalam pertubuhan itu, hendaklah warganegara Persekutuan;
- (h) punca-punca yang daripadanya pertubuhan akan mendapat pendapatannya, termasuk kadar-kadar dan kaedah membayar apa-apa bayaran masuk dan yuran berkala sebagaimana yang diputuskan;
- (i) kuasa atau kuasa-kuasa berkenaan dengan perbelanjaan daripada kumpulan-kumpulan wang pertubuhan;
- (j) penyimpanan kira-kira pendapatan dan perbelanjaan pertubuhan dan penyiaran kira-kira itu kepada anggota-anggotanya tiap-tiap tahun;
- (k) perlantikan seorang atau beberapa orang juruaudit;
- (l) cukupbilang yang dikehendaki untuk menjalankan urusan dalam mana-mana mesyuarat pertubuhan atau badan pengelolanya; dan
- (m) cara bagaimana perlembagaan atau aturan-aturan pertubuhan boleh dipinda.

2. Jika sesuatu pertubuhan adalah berjenis politik, maka perlembagaan atau aturan-aturannya hendaklah, sebagai tambahan kepada perkara-perkara yang disenaraikan di dalam perenggan 1, mengadakan peruntukan bahawa—

(a) tiap-tiap anggota pertubuhan itu, tiap-tiap pegawai yang menjalankan kerja-kerja tadbiran di dalam pertubuhan itu dan tiap-tiap penasihat, bagi pertubuhan itu, hendaklah warganegara Persekutuan; dan

(b) tiap-tiap anggota adalah berhak mengundi dan boleh memegang jawatan dalam jawatankuasa atau badan pengelola dalam pertubuhan itu.

3. Jika mana-mana pertubuhan berdaftar membuat peruntukan dalam perlembagaan atau aturan-aturannya berkenaan dengan penubuhan cawangan-cawangan, maka ianya hendaklah juga membuat peruntukan di dalamnya berkenaan dengan kaedah dan cara bagaimana penubuhan cawangan-cawangan itu akan diluluskan oleh pertubuhan itu atau badan pengelolanya.

JADUAL 2

(Seksyen 7 (3) (f))

PERLEMBAGAAN DAN ATURAN-ATURAN PERTUBUHAN-PERTUBUHAN FAEDAH BERSAMA

Perkara-perkara yang peruntukan baginya mesti dibuat dalam perlembagaan atau aturan-aturan bagi tiap-tiap Pertubuhan Faedah Bersama ialah—

(a) nama pertubuhan dan tempat untuk urusan pertubuhan;

(b) segala tujuan pertubuhan dan syarat seseorang ahli atau peyuran berhak mendapat apa-apa faedah;

(c) cara membuat, mengubah, meminda dan membatalkan aturan-aturan:

Dengan syarat bahawa tiada apa-apa perubahan boleh dibuat yang akan mengurangkan faedah-faedah yang diperuntukkan oleh aturan-aturan itu dengan tidak mendapat persetujuan daripada tiga per empat daripada jumlah bilangan anggota-anggota atau peyuran-peyuran, yang didapati dengan jalan undi kertas;

(d) pemilihan dan pemberhentian kerja pemegang-pemegang jawatan, termasuk setiausaha, bendahari, pemegang amanah dan lain-lain pemegang-jawatan bagi pertubuhan;

(e) pemberian salinan aturan-aturan pertubuhan kepada tiap-tiap anggota atau peyuran;

(f) jagaan dan pelaburan kumpulan-kumpulan wang pertubuhan dan jawatan pemegang-pemegang jawatan yang bertanggungjawab kerananya dan pengauditan tahunan atau berkala kira-kira pertubuhan;

(g) pemeriksaan buku-buku dan daftar nama-nama bagi anggota-anggota atau bagi peyuran-peyuran pertubuhan oleh mana-mana orang yang ada mempunyai kepentingan dalam kumpulan-kumpulan wang pertubuhan;

- (h) penyimpanan daftar berserta butir-butir mengenai umur, nama dan alamat seseorang anggota atau peyuran dan orang yang dinamakan (jika ada) bagi anggota atau peyuran pertubuhan;
- (i) sekecil-kecil bilangan bagi cukupbilang untuk mesyuarat-mesyuarat agung dan mesyuarat-mesyuarat jawatankuasa, iaitu sekecil-kecil bilangan untuk mesyuarat-mesyuarat agung ialah tidak boleh kurang daripada tiga kali jumlah bilangan ahli-ahli jawatankuasa dan untuk mesyuarat-mesyuarat jawatankuasa ialah tidak boleh kurang daripada setengah daripada jumlah bilangan ahli-ahli jawatankuasa; dan
- (j) cara memutuskan pertikaian di antara—
 - (i) seseorang anggota atau peyuran atau seseorang yang menuntut melalui seseorang anggota atau seseorang peyuran atau menurut aturan-aturan sesuatu pertubuhan berdaftar dengan pertubuhan atau seseorang pemegang jawatannya; dan
 - (ii) mana-mana orang yang musykil yang telah berhenti menjadi seorang anggota sesuatu pertubuhan berdaftar atau mana-mana orang yang menuntut melalui orang yang musykil itu dengan pertubuhan atau seseorang pemegang jawatannya.

AKTA PERTUBUHAN 1966 (AKTA 335)

SENARAI PINDAAN

| Undang-Undang yang meminda | Tajuk ringkas | Berkuatkuasa dari |
|-------------------------------|--------------------------------|----------------------|
| Akta A700 | Akta Pertubuhan (Pindaan) 1988 | 10-6-1988 |
| Akta A743 | Akta Pertubuhan (Pindaan) 1990 | 12-1-1990 |
| Akta A859 | Akta Pertubuhan (Pindaan) 1993 | 3-3-1994 |
| Akta A1027 | Akta Pertubuhan (Pindaan) 1998 | 2-7-1998 |

Ruangan ini dibiarkan kosong dengan sengaja.

**PERATURAN-PERATURAN
PERTUBUHAN 1984**

[P.U. (A) 402/1984]

PERATURAN-PERATURAN PERTUBUHAN 1984

[P.U. (A) 402/1984]

SUSUNAN PERATURAN-PERATURAN

Peraturan

1. Nama.
2. Tafsiran.
3. Permohonan bagi pendaftaran pertubuhan tempatan.
4. Akuan penerimaan permohonan.
5. Perakuan pendaftaran.
6. Pemberitahuan mengenai keputusan Pendaftar menolak pendaftaran pertubuhan tempatan.
7. Permohonan oleh pertubuhan berdaftar untuk menukar nama, dll., atau menubuhkan cawangan.
8. Permohonan bagi pembatalan pendaftaran.
9. Kuasa Pendaftar meminta keterangan.
10. Maklumat yang kena diberi di bawah seksyen 14 Akta.
11. Menandatangani dokumen.
12. Dokumen hakmilik dan rekod-rekod bertulis sesuatu pertubuhan.
13. Amaun perbelanjaan pentadbiran.
14. Orang-orang yang bertanggungjawab.
15. Penyiaran dalam *Warta*.
16. Fee.
17. Pengecualian dari membayar fee.
18. Pembatalan.
Jadual.

Ruangan ini dibiarkan kosong dengan sengaja.

PERATURAN-PERATURAN PERTUBUHAN 1984*

Pada menjalankan kuasa-kuasa yang diberi oleh seksyen 67 Akta Pertubuhan 1966, Menteri membuat peraturan-peraturan yang berikut:

1. Nama.

Peraturan-peraturan ini bolehlah dinamakan **Peraturan-Peraturan Pertubuhan 1984**.

2. Tafsiran.

Dalam Peraturan-Peraturan ini, melainkan jika konteksnya menghendaki makna yang lain—

“Borang” ertinya Borang yang sesuai yang dinyatakan dalam Jadual;

“pemegang jawatan utama”, berhubungan dengan sesuatu pertubuhan atau mana-mana cawangan sesuatu pertubuhan, ertinya mana-mana orang yang berkenaan dengan pertubuhan atau cawangan itu, menunaikan fungsi atau kewajipan atau menjalankan kuasa-kuasa seorang yang dipertua, pengerusi, timbalan yang dipertua, timbalan pengerusi, naib yang dipertua, naib pengerusi, bendahari atau setiausaha, sama ada dipanggil dengan mana-mana nama itu atau tidak.

3. Permohonan bagi pendaftaran pertubuhan tempatan.

(1) Tiap-tiap permohonan bagi pendaftaran sesuatu pertubuhan tempatan di bawah seksyen 6 Akta hendaklah dibuat kepada Pendaftar dalam enam salinan dalam Borang 1 (yang Borangnya akan dibekalkan oleh Pendaftar atau oleh Penolong Pendaftar), dan tiap-tiap salinan borang itu hendaklah ditandatangani oleh dua orang pemegang jawatan utama pertubuhan itu.

(2) Enam salinan kaedah-kaedah pertubuhan itu dalam Bahasa Malaysia atau Bahasa Inggeris hendaklah dikemukakan kepada Pendaftar atau Penolong Pendaftar bersama-sama tiap-tiap permohonan itu.

(3) Tiap-tiap salinan kaedah-kaedah yang dikemukakan di bawah perenggan (2) hendaklah diperakui betul oleh dua orang pemegang jawatan utama pertubuhan itu.

4. Akuan penerimaan permohonan.

Apabila sesuatu permohonan untuk pendaftaran sesuatu pertubuhan tempatan diterima, Pendaftar atau Penolong Pendaftar hendaklah menghantar kepada pertubuhan itu suatu akuan penerimaan dalam Borang 2.

5. Perakuan pendaftaran.

Perakuan pendaftaran yang dikeluarkan oleh Pendaftar di bawah seksyen 8 Akta hendaklah dalam Borang 3.

*Diterbitkan sebagai PU (A) 402/1984.

6. Pemberitahuan mengenai keputusan Pendaftar menolak pendaftaran pertubuhan tempatan.

Keputusan Pendaftar menolak pendaftaran mana-mana pertubuhan tempatan hendaklah diberitahu dalam Borang 4.

7. Permohonan oleh pertubuhan berdaftar untuk menukar nama, dll., atau menubuhkan cawangan.

(1) Tiap-tiap permohonan oleh sesuatu pertubuhan berdaftar bagi mendapat kelulusan terdahulu dari Pendaftar berkenaan dengan mana-mana perkara yang tersebut dalam seksyen 11 (1) Akta hendaklah dibuat mengikut apa-apa bentuk sebagaimana dikehendaki oleh Pendaftar.

(2) Tiap-tiap permohonan oleh sesuatu pertubuhan berdaftar bagi mendapat kelulusan terdahulu dari Pendaftar di bawah seksyen 12 (1) Akta untuk menubuhkan suatu cawangannya hendaklah dibuat dalam Borang 5.

(3) Tiap-tiap permohonan yang tersebut di dalam peraturan ini hendaklah dibuat dalam empat salinan dan tiap-tiap salinan hendaklah ditandatangani oleh dua orang pemegang jawatan utama pertubuhan berdaftar itu atau pertubuhan ibu bagi cawangan yang dicadangkan itu, mengikut mana yang berkenaan.

(4) Keputusan Pendaftar berkenaan dengan mana-mana permohonan yang tersebut di dalam peraturan ini hendaklah diberitahu kepada pertubuhan berdaftar yang berkenaan itu mengikut apa-apa bentuk sebagaimana ditentukan oleh Pendaftar.

8. Permohonan bagi pembatalan pendaftaran.

Tiap-tiap permohonan bagi pembatalan pendaftaran sesuatu pertubuhan berdaftar di bawah seksyen 13 (1) (a) Akta atas pembubaran pertubuhan itu hendaklah dibuat dalam dua salinan yang pada matannya mengikut Borang 6 dan hendaklah ditandatangani oleh seorang pemegang jawatan utama dan oleh tidak kurang daripada tujuh orang anggota lain pertubuhan itu.

9. Kuasa Pendaftar meminta keterangan.

Apabila sesuatu permohonan bagi pembatalan pendaftaran sesuatu pertubuhan berdaftar diserahkan kepadanya, Pendaftar boleh, jika dia ada sebab untuk mempercayai bahawa orang-orang yang menandatangani permohonan itu telah tidak diberi kuasa dengan sepenuhnya oleh pertubuhan itu untuk membuat permohonan tersebut, menghendaki daripada orang-orang yang menandatangani permohonan itu apa-apa keterangan yang difikirkannya perlu dan dia boleh juga memeriksa mana-mana pemegang jawatan atau anggota pertubuhan itu bagi maksud menentukan faktor-faktor berkaitan dengan permohonan tersebut.

10. Maklumat yang kena diberi di bawah seksyen 14 Akta.

(1) Maklumat yang dikehendaki supaya dikemukakan kepada Pendaftar di bawah seksyen 14 (1) Akta oleh tiap-tiap pertubuhan berdaftar dan oleh tiap-

tiap cawangan sesuatu pertubuhan berdaftar hendaklah dibuat dalam tiga salinan mengikut apa-apa bentuk sebagaimana dikehendaki oleh Pendaftar.

(2) Apa-apa maklumat yang Pendaftar menghendaki sesuatu pertubuhan berdaftar mengemukakan kepadanya di bawah seksyen 14 (2) Akta hendaklah dibuat dalam tiga salinan mengikut apa-apa bentuk sebagaimana dikehendaki oleh Pendaftar.

(3) Tiap-tiap salinan maklumat yang tersebut dalam peraturan ini hendaklah ditandatangani oleh dua orang pemegang jawatan utama pertubuhan atau cawangan itu, mengikut mana yang berkenaan, dan berkenaan dengan sesuatu cawangan, borang-borang itu hendaklah juga ditandatangani timbal oleh seorang pemegang jawatan utama pertubuhan ibunya.

11. Menandatangani dokumen.

Bila-bila masa sahaja di dalam Peraturan-Peraturan ini apa-apa permohonan, penyata atau lain-lain dokumen dikehendaki supaya ditandatangani oleh seorang atau lebih daripada seorang pemegang jawatan utama sesuatu pertubuhan atau cawangan sesuatu pertubuhan, nama dan jawatan yang dipegang oleh penandatangan itu hendaklah ditaip dengan terang atau ditulis dengan huruf cerai, dan dengan huruf Cina, jika berkenaan, sebaik sahaja di bawah atau di sebelah tandatangannya atas dokumen itu.

12. Dokumen hakmilik dan rekod-rekod bertulis sesuatu pertubuhan.

(1) Pendaftar boleh pada bila-bila masa dengan notis yang ditandatangani, memerintahkan mana-mana pertubuhan atau cawangan pertubuhan itu supaya mengemukakan untuk pemeriksaannya—

- (a) dokumen-dokumen hakmilik bagi apa-apa harta yang dipegang olehnya;
- (b) segala atau mana-mana buku akaunnya;
- (c) minit-minit atau lain-lain rekod mengenai prosiding pertubuhan atau cawangan itu atau mana-mana jawatankuasa atau badan pengelola pertubuhan atau cawangan tersebut;
- (d) apa-apa dokumen lain yang disimpan atau disenggara oleh pertubuhan atau cawangan itu.

(2) Mana-mana orang yang tidak mematuhi apa-apa perintah yang diberi oleh Pendaftar di bawah perenggan (1) adalah melakukan suatu kesalahan dan apabila disabitkan boleh dikenakan denda tidak lebih daripada seribu ringgit atau penjara selama tempoh tidak lebih daripada enam bulan atau kedua-duanya.

13. Amaun perbelanjaan pentadbiran.

Amaun yang boleh dipotong oleh sesuatu pertubuhan berdaftar di bawah seksyen 31 Akta bagi perbelanjaan pentadbiran atau apa-apa perbelanjaan lain tidak boleh, melainkan dengan kelulusan terdahulu dari Pendaftar, melebihi empat puluh sen daripada yuran bulanan yang dipungut daripada seorang anggota pertubuhan itu dan sepuluh peratus daripada apa-apa pendapatan lain pertubuhan tersebut.

14. Orang-orang yang bertanggungjawab.

Kewajipan yang dikenakan ke atas sesuatu pertubuhan menurut kuasa Peraturan-Peraturan ini adalah mengikat tiap-tiap pemegang jawatan pertubuhan itu dan tiap-tiap orang yang mengurus atau membantu dalam pengurusan pertubuhan itu.

15. Penyiaran dalam Warta.

Pendaftar hendaklah menyiarkan dalam Warta—

- (a) pendaftaran sesuatu pertubuhan tempatan;
- (b) penolakan pendaftaran sesuatu pertubuhan tempatan;
- (c) pembatalan pendaftaran atau pembubaran sesuatu pertubuhan tempatan;
- (d) apa-apa penukaran nama mana-mana pertubuhan berdaftar.

16. Fee.

(1) Fee yang berikut hendaklah dibayar berkenaan dengan hal-hal yang tersebut dalam Akta dan dalam Peraturan-Peraturan ini:

- | | |
|---------------------------------------------------------------------------------------------------------------------------------------------------------------------------------------------------------|--------------------------------|
| (a) mengenai apa-apa permohonan di bawah seksyen 6 Akta bagi pendaftaran sesuatu pertubuhan (peraturan 3) | \$30.00 |
| (b) bagi mengeluarkan perakuan pengesahan di bawah seksyen 9 (b) Akta atau bagi mendaftarkan seseorang anggota sesuatu pertubuhan sebagai pegawai awam di bawah seksyen 9 (c) Akta | \$10.00 |
| (c) mengenai apa-apa permohonan di bawah seksyen 11 (1) Akta untuk kelulusan bagi apa-apa penukaran nama atau tempat urusan atau bagi sesuatu pindaan kepada kaedah-kaedah sesuatu pertubuhan berdaftar | \$10.00 |
| (d) mengenai apa-apa permohonan di bawah seksyen 12 Akta untuk kelulusan bagi menubuhkan sesuatu cawangan pertubuhan (peraturan 7) | \$10.00 |
| (e) mengenai apa-apa permohonan untuk suatu salinan diperakui mana-mana dokumen yang diberi kepada sesuatu pertubuhan oleh Pendaftar dan disebut dalam peraturan 5, 6 atau 7 | \$10.00 bagi tiap-tiap salinan |
| (f) bagi membuat salinan-salinan diperakui mana-mana dokumen yang difaalkan di bawah Akta | \$2.00 bagi tiap-tiap muka |

- | | |
|---------------------------------------------------------------------------------------------------------------------|---------|
| (g) bagi memeriksa dokumen-dokumen sesuatu pertubuhan yang ada dalam milik Pendaftar atau Penolong Pendaftar | \$10.00 |
| (h) bagi memproses sesuatu rayuan kepada Menteri di bawah seksyen 18 Akta | \$50.00 |
| (i) mengenai apa-apa permohonan bagi maklumat mengenai nama dan/atau alamat sesuatu pertubuhan | \$ 2.00 |

(2) Fee yang tersebut dalam perenggan (1) hendaklah dibayar dengan setem-setem yang dilekatkan kepada permohonan dan hendaklah dibatalkan oleh Pendaftar atau Penolong Pendaftar apabila menerima permohonan itu.

17. Pengecualian dari membayar fee.

Walau apapun peraturan 16, tiada apa-apa fee kena dibayar berkenaan dengan apa-apa hal yang tersebut dalam peraturan itu jika hal itu berkaitan dengan maklumat mengenai sesuatu pertubuhan dan maklumat itu dikehendaki bagi sesuatu maksud rasmi oleh mana-mana jabatan Kerajaan Persekutuan atau Negeri, pihak berkuasa berkanun atau lain-lain agensi Kerajaan Persekutuan atau Negeri, atau pihak berkuasa tempatan, sebagaimana diluluskan oleh Pendaftar.

18. Pembatalan.

Peraturan-peraturan Pertubuhan 1966 adalah dibatalkan.

JADUAL
MALAYSIA
AKTA PERTUBUHAN 1966
PERATURAN-PERATURAN PERTUBUHAN 1984
BORANG 1
(Peraturan 3)
PERMOHONAN BAGI PENDAFTARAN PERTUBUHAN

KEPADA:

PENDAFTAR PERTUBUHAN

Sebagaimana yang dikehendaki oleh seksyen 6 Akta Pertubuhan 1966, kami dengan ini membuat permohonan untuk mendaftarkan pertubuhan yang butir-butirnya diberi di bawah ini.

2. Butir-butir mengenai pertubuhan itu ialah:

(1) nama

- (2) alamat—
- (a) tempat urusan
- (b) alamat pos
- (3) penubuhan pertubuhan (Sila sertakan dua salinan minit mesyuarat penubuhan pertubuhan itu) (*Huraian 3*) —
- (a) tarikh ditubuhkan
- (b) bilangan orang yang menghadiri mesyuarat penubuhan pertubuhan itu
- (4) bilangan anggota dalam daftar anggota pada masa ini
- (5) (a) adakah pertubuhan ini pernah didaftarkan sebelum ini di bawah Akta Pertubuhan 1966?
- (b) nombor pendaftaran dahulu (jika ada)
- (6) adakah pertubuhan ini menggunakan apa-apa bendera, lambang, lencana atau warna atau apa-apa tanda lain (*Huraian 4*)?
- (7) jumlah wang—
- (a) yang telah diterima semenjak ditubuhkan.....
- (b) yang telah dibelanjakan semenjak ditubuhkan
- (c) yang berbaki dalam tangan pada masa ini
- (d) yang berbaki dalam bank dan nama bank
- (8) adakah pertubuhan menggunakan apa-apa—
- (a) buku yuran?
- (b) buku tunai?
- (c) buku resit?
- (9) tahun kewangan pertubuhan bermula padatiap-tiap tahun.
- (10) butir-butir mengenai harta tak alih yang dipunyai dan/atau yang dipajak-kecil oleh pertubuhan adalah seperti berikut:
- | Tempat | No. Hakmilik | Maksud digunakan (<i>Huraian 5</i>) |
|--------|--------------|---------------------------------------|
| | | |
| | | |
- (Sertakan dua salinan fotostat dokumen hakmilik harta tak alih yang dipunyai oleh pertubuhan).

3. Enam salinan senarai pemegang-pemegang jawatan pertubuhan yang mengandungi butir-butir berikut adalah dikemukakan bersama-sama ini:


Nama (termasuk apa-apa nama lain, jika ada), dan di dalam huruf Cina jika berkenaan, nombor kad pengenalan pendaftaran negara, tarikh lahir, tempat lahir dan pekerjaan pemegang-pemegang jawatan, nama dan alamat majikan pemegang-pemegang jawatan dan alamat rumah pemegang-pemegang jawatan serta jawatan yang dipegang oleh mereka (*Huraian 6*).

4. Enam salinan diperakui perlembagaan/kaedah-kaedah* pertubuhan di dalam Bahasa Malaysia/Bahasa Inggeris* adalah dikemukakan bersama-sama ini (*Huraian 7*).

5. Kami memperakui bahawa pada sepanjang pengetahuan dan kepercayaan kami maklumat yang diberi di dalam permohonan ini adalah benar dan betul pada tiap-tiap butir.

Bertarikh pada..... haribulan....., 19.....

Kami,



(Tandatangan).....

(Nama).....

(Jawatan).....

(Tandatangan).....

(Nama).....

(Jawatan).....

**Potong yang mana tidak berkenaan.*

HURAIAN

(Huraian ini adalah dimaksudkan sebagai panduan am bagi mengisikan borang ini. Jika pertolongan atau bantuan dikehendaki selanjumnya mintalah nasihat daripada Pendaftar Pertubuhan atau daripada mana-mana Penolong Pendaftar).

1. Enam salinan borang ini adalah dikehendaki, dan tiap-tiap salinan mestilah ditandatangani oleh mana-mana dua orang pemegang-pemegang jawatan utama pertubuhan itu. Pemegang-pemegang jawatan utama ialah yang dipertua, pengerusi, timbalan yang dipertua, timbalan pengerusi, naib yang dipertua, naib pengerusi, setiausaha dan bendahari.
2. Jika ruang yang diperuntukkan dalam borang ini tidak mencukupi, maka maklumat yang dikehendaki itu hendaklah diberi dalam kertas-kertas tambahan yang hendaklah dikembarkan bersama borang ini. Tiap-tiap kertas tambahan mestilah ditandatangani oleh orang-orang yang menandatangani borang ini.
3. Minit mesyuarat penubuhan mestilah ditandatangani oleh dua orang pemegang jawatan utama pertubuhan.
4. Enam salinan facsimile bendera, lambang, lencana atau warna atau lain-lain tanda berwarna dan enam salinan makna mengenai bendera, lambang, lencana atau warna atau lain-lain tanda hendaklah disertakan. Tiap-tiap salinan mestilah ditandatangani oleh dua orang pemegang jawatan utama pertubuhan.
5. Suatu huraian ringkas hendaklah diberi tentang maksud harta itu digunakan, misalan "rumah kelab", "padang permainan". Jika pertubuhan itu tidak mempunyai harta tak alih, maka bahagian ini dalam borang ini hendaklah ditulis "TIADA".
6. Gunakan kertas-kertas yang berasingan untuk memberi butir-butir yang dikehendaki dalam perenggan 3 borang ini. Tiap-tiap kertas mestilah ditandatangani oleh orang-orang yang menandatangani borang ini.
7. Tiap-tiap naskah perlembagaan atau kaedah-kaedah itu mestilah diperakui betul oleh dua orang pemegang jawatan utama pertubuhan dengan menurunkan tandatangan mereka di muka surat akhir tiap-tiap naskah perlembagaan atau kaedah-kaedah itu. Nama dan jawatan yang dipegang oleh pemegang-pemegang jawatan yang berkenaan hendaklah ditaip atau ditulis dengan terang dalam huruf cerai sebaik sahaja di bawah tandatangan mereka.

MALAYSIA

AKTA PERTUBUHAN 1966

PERATURAN-PERATURAN PERTUBUHAN 1984

BORANG 2

(Peraturan 4)

AKUAN PENERIMAAN PERMOHONAN UNTUK PENDAFTARAN

Pendaftar Pertubuhan mengaku menerima untuk pendaftaran di bawah Akta Pertubuhan 1966 permohonan

(Nama Pertubuhan)

bertarikh pada haribulan....., 19.....
dan akan memberitahu tuan mengenai keputusan permohonan tuan itu dengan secepat mungkin.

Bertarikh pada haribulan....., 19.....

.....
*Pendaftar Pertubuhan,
Malaysia*

KEPADA:

.....
.....
.....
.....

Catitan — Tuan diminta mengambil perhatian kepada subseksyen (2) dan (3) seksyen 6 Akta Pertubuhan 1966 yang berbunyi:

- Seksyen 6 (2) ... Sehingga sesuatu pertubuhan tempatan didaftarkan di bawah Akta ini, tiadalah sesiapa jua boleh, dengan tiada kebenaran bertulis daripada Pendaftar, menyusun atau mengambil bahagian di dalam apa-apa gerakan atau bagi pihak pertubuhan itu, kecuali hanya untuk memohon kepada atau untuk bersurat-menyurat dengan Pendaftar.
- Seksyen 6 (3) ... Sesiapa yang melakukan pelanggaran terhadap seksyen-kecil (2) adalah melakukan suatu kesalahan, dan apabila disabitkan, bolehlah dikenakan denda tidak lebih daripada dua ribu ringgit, dan jika pelanggaran itu adalah suatu pelanggaran yang berlanjutan, maka orang itu bolehlah dikenakan denda tidak lebih daripada dua ratus ringgit bagi tiap-tiap hari pelanggaran itu dilanjutkan selepas hari yang pertama.

Tuan adalah diminta supaya memberi akuan penerimaan borang ini.

MALAYSIA
AKTA PERTUBUHAN 1966
PERATURAN-PERATURAN PERTUBUHAN 1984
BORANG 3
(Peraturan 5)

PERAKUAN PENDAFTARAN

Adalah dengan ini diperakui bahawa
.....
telah pada hari ini didaftarkan sebagai suatu pertubuhan di bawah seksyen 7 Akta Pertubuhan
1966 dan bahawa nombor pendaftarannya ialah.....
Diperbuat dengan ditandatangani oleh saya pada..... haribulan.....
19.....

.....
*Pendaftar Pertubuhan,
Malaysia*

MALAYSIA
AKTA PERTUBUHAN 1966
PERATURAN-PERATURAN PERTUBUHAN 1984
BORANG 4
(Peraturan 6)
**PEMBERITAHUAN MENGENAI PENOLAKAN PENDAFTARAN
PERTUBUHAN**

Mengikut peruntukan-peruntukan seksyen 7 Akta Pertubuhan 1966, maka adalah diberitahu
bahawa saya telah menolak pendaftaran
.....
.....
..... di
bawah Akta.

Bertarikh pada..... haribulan....., 19.....

.....
*Pendaftar Pertubuhan,
Malaysia*

Catitan — Di bawah seksyen 18 Akta Pertubuhan 1966, mana-mana pertubuhan tempatan,
pemegang jawatan atau anggota pertubuhan itu atau mana-mana orang lain yang musykil
dengan keputusan Pendaftar boleh merayu terhadap keputusan itu kepada Menteri dalam masa
tiga puluh hari dari tarikh keputusan itu dan atas pembayaran fee berupa setem sebanyak lima
puluh ringgit.

MALAYSIA
AKTA PERTUBUHAN 1966
PERATURAN-PERATURAN PERTUBUHAN 1984
BORANG 5

[Peraturan 7 (2)]

**PERMOHONAN UNTUK KELULUSAN MENUBUHKAN
CAWANGAN PERTUBUHAN**

KEPADA:

PENDAFTAR PERTUBUHAN

Sebagaimana yang dikehendaki oleh seksyen 12 Akta Pertubuhan 1966, kami dengan ini membuat permohonan untuk kelulusan menubuhkan suatu cawangan bagi pertubuhan yang tersebut di bawah ini:

.....
(Nama Pertubuhan)


2. Butir-butir mengenai pertubuhan itu ialah:

- (1) nama
- (2) tempat urusan dan alamat pos (jika lain) (*Huraian 3*)
- (3) tahun kewangan bagi cawangan itu akan bermula pada
tiap-tiap tahun.
- (4) (a) sudahkah cawangan ini diluluskan sebelum ini?
- (b) tarikh kelulusan yang lalu

3. Tiga salinan diperakui perlembagaan/kaedah-kaedah* cawangan itu di dalam Bahasa Malaysia/Bahasa Inggeris* dikemukakan bersama-sama ini. (*Huraian 4*).

4. Kami dengan ini memperakui bahawa pada sepanjang pengetahuan dan kepercayaan kami maklumat yang diberi di dalam permohonan ini adalah benar dan betul pada tiap-tiap butir.

Bertarikh pada..... haribulan....., 19.....



Kami,

(Tandatangan).....
(Nama).....
(Jawatan).....
(Tandatangan).....
(Nama).....
(Jawatan).....

*Potong yang mana tidak berkenaan.

HURAIAN

(Huraian ini adalah dimaksudkan sebagai panduan am bagi mengisi borang ini. Jika pertolongan atau bantuan dikehendaki selanjutnya, mintalah nasihat daripada Pendaftar Pertubuhan atau daripada mana-mana Penolong Pendaftar).

1. Empat salinan borang ini adalah dikehendaki, dan tiap-tiap salinan mestilah ditandatangani oleh mana-mana dua orang pemegang jawatan utama pertubuhan yang hendak membuat permohonan hendak menubuhkan cawangan itu. Pemegang-pemegang jawatan utama ialah yang dipertua, pengerusi, timbalan yang dipertua, timbalan pengerusi, naib yang dipertua, naib pengerusi, setiausaha dan bendahari.
2. Jika ruang yang diperuntukkan dalam borang ini tidak mencukupi, maka maklumat yang dikehendaki itu hendaklah diberi dalam kertas-kertas tambahan yang hendaklah dikembalikan bersama borang ini. Tiap-tiap kertas tambahan mestilah ditandatangani oleh orang-orang yang menandatangani borang ini.
3. Tempat urusan cawangan itu ialah alamat ke mana segala surat akan dihantar melainkan jika suatu alamat pos yang lain ada diberi.
4. Jika cawangan itu tidak akan mempunyai perlembagaan atau kaedah-kaedahnya sendiri yang berasingan dengan perlembagaan atau kaedah-kaedah pertubuhan ibunya, maka perenggan 3 dalam borang ini hendaklah dipotong.
5. Tiap-tiap naskah perlembagaan atau kaedah-kaedah itu (jika perenggan 3 borang ini telah tidak dipotong) mestilah diperakui betul oleh dua orang pemegang jawatan utama pertubuhan itu dengan menurunkan tandatangan mereka di muka surat akhir tiap-tiap naskah perlembagaan atau kaedah-kaedah itu. Nama dan jawatan yang dipegang oleh pemegang-pemegang jawatan yang berkenaan hendaklah ditaip atau ditulis dengan terang dalam huruf cerai sebaik sahaja di bawah tandatangan mereka.

MALAYSIA

AKTA PERTUBUHAN 1966

PERATURAN-PERATURAN PERTUBUHAN 1984

BORANG 6

(Peraturan 8)

PERMINTAAN SUPAYA DIBATALKAN PERAKUAN PENDAFTARAN

Nama pertubuhan berdaftar

Nombor pendaftaran

Alamat berdaftar

Bertarikh pada..... haribulan....., 19.....

Kepada Pendaftar Pertubuhan*

Pertubuhan yang tersebut di atas dalam suatu mesyuarat agung† yang diadakan pada haribulan....., 19..... telah mengambil ketetapan seperti berikut:‡

Oleh yang demikian kami meminta supaya pendaftarannya di bawah Akta Pertubuhan 1966 dibatalkan.

Perakuan pendaftaran No..... adalah dikemukakan bersama ini.

Kami memperakui bahawa kenyataan-kenyataan yang terkandung di dalam permohonan ini sepanjang pengetahuan dan kepercayaan kami adalah benar.

Tandatangan pemegang jawatan utama

1.

Nama.....

Nombor kad pengenalan pendaftaran negara.....

(Meterai Pertubuhan, jika ada)

2.

Nama.....

Nombor kad pengenalan pendaftaran negara.....

3.

Nama.....

Nombor kad pengenalan pendaftaran negara.....

4.

Nama.....

Nombor kad pengenalan pendaftaran negara.....

Tandatangan anggota-anggota

5.

Nama.....

Nombor kad pengenalan pendaftaran negara.....

6.

Nama.....

Nombor kad pengenalan pendaftaran negara.....

7.

Nama.....

Nombor kad pengenalan pendaftaran negara.....

8.

Nama.....

Nombor kad pengenalan pendaftaran negara.....

* Permintaan ini hendaklah dialamatkan kepada Penolong Pendaftar bagi kawasan di mana ibu pejabat pertubuhan itu terletak.

† Jika tidak di suatu mesyuarat agung, nyatakan bagaimana caranya ketetapan telah dibuat bagi permintaan ini.

‡ Di sini beri salinan ketetapan yang sebenarnya.

Diperbuat pada 27hb September 1984.

**PERATURAN-PERATURAN
PERTUBUHAN (PERMOHONAN BAGI
PERINTAH PERLETAKHAKAN) 1993**

[PU (A) 281/1993]

**PERATURAN-PERATURAN PERTUBUHAN
(PERMOHONAN BAGI PERINTAH
PERLETAKHAKAN) 1993***

PADA menjalankan kuasa yang diberikan oleh seksyen 67 Akta Pertubuhan 1966, Menteri membuat peraturan-peraturan yang berikut:

1. Nama.

Peraturan-peraturan ini bolehlah dinamakan **Peraturan-Peraturan Pertubuhan (Permohonan bagi Perintah Perletakhakan) 1993.**

2. Tafsiran.

Dalam Peraturan-Peraturan ini, melainkan jika konteksnya menghendaki makna yang lain—

“Akta” ertinya Akta Pertubuhan 1966;

“Borang” ertinya Borang yang sesuai yang dinyatakan dalam Jadual;

“pemegang jawatan utama”, berhubungan dengan suatu pertubuhan atau apa-apa cawangan pertubuhan itu, ertinya mana-mana orang yang, berkenaan dengan pertubuhan atau cawangan itu, melaksanakan fungsi atau tugas atau menjalankan kuasa sebagai presiden, pengerusi, timbalan presiden, timbalan pengerusi, naib presiden, naib pengerusi, bendahari atau setiausaha sama ada dipanggil dengan nama sedemikian atau selainnya;

“pertubuhan baru” ertinya suatu pertubuhan baru yang didaftarkan di bawah Akta;

“pertubuhan lama” ertinya suatu pertubuhan berdaftar yang pendaftarannya telah dibatalkan oleh Pendaftar di bawah seksyen 13 Akta.

3. Permintaan dan keizinan bagi perintah perletakhakan.

Permintaan dan keizinan badan pengelola suatu pertubuhan baru bagi perintah perletakhakan di bawah subseksyen 17B(1) Akta hendaklah dalam Borang 1.

4. Akujanji bertulis pertubuhan baru.

Akujanji bertulis badan pengelola suatu pertubuhan baru bahawa pertubuhan itu akan mengambil alih tanggungjawab bagi segala hutang dan tanggungan pertubuhan lama yang dikehendaki di bawah subseksyen 17B(1) Akta hendaklah dalam Borang 2.

5. Maklumat hendaklah dikemukakan kepada Pegawai Pemegang Harta.

(1) Badan pengelola pertubuhan baru hendaklah mengemukakan kepada Pegawai Pemegang Harta dalam Borang 3 nama dan nombor kad pengenalan semua anggota sah pertubuhan lama sebelum sahaja tarikh pembatalan pendaftarannya; nama anggota sah itu yang sekarang ialah anggota pertubuhan baru hendaklah digariskan.

**Diterbitkan sebagai PU (A) 281/1993.*

(2) Pemegang jawatan utama yang menandatangani Borang 3 hendaklah menyatakan jumlah anggota sah pertubuhan lama dan jumlah anggota itu yang sekarang ialah anggota pertubuhan baru.

6. Borang hendaklah ditandatangani oleh pemegang jawatan utama.

6. Borang 1, 2 dan 3 hendaklah ditandatangani oleh dua pemegang jawatan utama pertubuhan baru. Enam salinan setiap Borang, yang telah diisi dengan sewajarnya, hendaklah dikemukakan kepada Pegawai Pemegang Harta.

7. Pegawai Pemegang Harta boleh menghendaki maklumat lanjut.

Pegawai Pemegang Harta boleh, apabila menerima Borang 1, 2 dan 3, melalui notis, mengarahkan pertubuhan baru mengemukakan apa-apa buku, rekod atau dokumen pertubuhan baru itu atau mana-mana cawangan pertubuhan itu untuk memuaskannya bahawa peruntukan seksyen 17B Akta telah dipatuhi.

8. Had masa bagi pemfailan permohonan oleh orang yang terjejas atau tidak puas hati.

(1) Mana-mana orang yang berkemungkinan terjejas atau tidak puas hati dengan keputusan Mahkamah Tinggi di bawah subseksyen 17B(1) Akta yang berniat untuk hadir dan membuat tuntutan berkenaan dengan permohonan Pegawai Pemegang Harta hendaklah memfailkan permohonannya dalam masa dua minggu dari tarikh akhir penyiaran saman permulaan dalam *Warta* atau suratkhobar.

(2) Pemohon hendaklah, dalam had masa bagi pemfailan permohonan itu, menyampaikan suatu salinan permohonan itu kepada Pegawai Pemegang Harta.

JADUAL

Borang 1

(Peraturan 3)

AKTA PERTUBUHAN 1966

PERATURAN-PERATURAN PERTUBUHAN (PERMOHONAN BAGI PERINTAH
PERLETAKHAKAN) 1993

PERMINTAAN DAN KEIZINAN BAGI PERINTAH PERLETAKHAKAN

Kepada:

Pegawai Pemegang Harta, Malaysia.

.....(badan pengelola) bagi.....
.....(pertubuhan baru)
dengan ini bersetuju dengan suatu perintah bagi meletakkan pada
.....(pertubuhan baru) segala aset,
hutang dan tanggungan(pertubuhan lama)
dan semua cawangannya yang pendaftarannya telah dibatalkan pada
.....dan kami dengan ini meminta Pegawai Pemegang
Harta, Malaysia untuk membuat suatu permohonan kepada Mahkamah Tinggi
bagi perintah perletakkan.

Kami mengemukakan bersama-sama ini yang berikut:

- (i) Suatu salinan Perakuan Pendaftaran
(pertubuhan baru).
- (ii) Suatu salinan perlembagaan dan kaedah-kaedah
.....(pertubuhan baru).
- (iii) Suatu salinan perlembagaan dan kaedah-kaedah
.....(pertubuhan lama).

3. Kami sesungguhnya percaya bahawa perlembagaan dan kaedah-kaedah.....(pertubuhan baru) adalah pada matanya serupa dengan pelembagaan dan kaedah-kaedah.....(pertubuhan lama).

Bertarikh pada 19.....

Kami,

(tanda tangan)

(nama)

(jawatan)

(tanda tangan)

(nama)

(jawatan)

Borang 2

(Peraturan 4)

AKTA PERTUBUHAN 1966

PERATURAN-PERATURAN PERTUBUHAN (PERMOHONAN BAGI PERINTAH
PERLETAKHAKAN) 1993

AKUJANJI PERTUBUHAN BARU

Kepada:

Pegawai Pemegang Harta, Malaysia.

.....(badan pengelola) bagi.....
.....(pertubuhan baru)
dengan ini memberikan akujanji kepada Pegawai Pemegang Harta, Malaysia
bahawa sekiranya Mahkamah Tinggi memberi Pegawai Pemegang Harta
suatu perintah di bawah subseksyen 17B(1) Akta,.....
.....(pertubuhan baru) akan mengambil alih tanggungjawab
bagi segala hutang dan tanggungan yang ada pada
(pertubuhan lama) dan semua cawangannya.

Bertarikh pada 19.....

Kami,
 (tanda tangan)
 (nama)
 (jawatan)
 (tanda tangan)
 (nama)
 (jawatan)

Borang 3
(Peraturan 5)

AKTA PERTUBUHAN 1966

PERATURAN-PERATURAN PERTUBUHAN (PERMOHONAN BAGI PERINTAH
 PERLETAKHAKAN) 1993

**SENARAI ANGGOTA SAH PERTUBUHAN LAMA YANG
 MENUNJUKKAN BILANGAN ANGGOTA ITU YANG SEKARANG INI
 MENGANGGOTAI PERTUBUHAN BARU**

Kepada:

Pegawai Pemegang Harta, Malaysia.

Berikut ialah senarai yang mengandungi nama dan nombor kad pengenalan
 semua anggota sah.....(pertubuhan lama) sebelum
 pendaftarannya dibatalkan pada.....

SENARAI

| No. | Nama | No. K/P |
|-------|-------|---------|
| | | |
| | | |
| | | |
| | | |
| | | |

2. Anggota yang nama mereka digariskan sekarang menjadi anggota
(pertubuhan baru).
3. Jumlah anggota sah(pertubuhan lama)
 yang ditunjukkan dalam senarai ialah
4. Jumlah anggota sah,(pertubuhan lama)
 yang sekarang ini menjadi anggota
 (pertubuhan baru)ialah

5. Kami memperakui bahawa sepanjang pengetahuan dan kepercayaan kami maklumat yang diberikan di atas adalah benar dan betul dari segala segi.

Bertarikh pada 19.....

Kami,

(tanda tangan)

(nama)

(jawatan)

(tanda tangan)

(nama)

(jawatan)

Dibuat pada 2hb Ogos 1993.